

# SAN PABLO KARTA ROMA ÇXHABTEWE'SX JÏI

## Romatewe'sxtxi Pablo weçxana fxi'jni

**1** <sup>1</sup> Adxa' Jesukristo's selpisáa Pablo yaaseth. Aça' adxa's Dxusku txhitçxa nvxiht, Kristo yuwe ewte nvxiitwa'jsa's pta'sxkahn. <sup>2</sup> Dxusa' txáa yuwe ewte nvxiitwa'jsa's pta'sxni yuuna jina kfxi'ja'kh nyafxíi entey Dxusna selpisaawe'sxtxi. <sup>3</sup> Aça' txáa Dxus yuwe ewte nvxiitwa'jsa' kwe'sxtxi jxpe'jsa Jesukristo Dxus Nçxi'ka'sku we'we'. Aça' Jesukristo' naa kiwete yu' jxkaahsa Davxid ji'thek upx kakwe yu'. <sup>4</sup> Nawa kîhtewa jxuka ájawa'jsa Dxus Nçxi'ktewa Dxus Espiritu' kwe'sxtxi kaajiyu'kh Jesukristo's uuniijü itxi vxitçxa. <sup>5</sup> Sa' adxa's peeygâhçxa Jesukristo nwe'wete', Dxus txhitxnisath yuu, Jesukristo's selpiwa'jsa, kxah naa kiwete maa nasawa Jesukristo's jiyuçxa jxpa'gatxna txá'sna nwēese'jya'. <sup>6</sup> Aça' i'kwe'sxwa Jesukristo's jiyuçxa ne'kwe jxpa'ga, Dxusa' petx i'kwe'sxne' txhitxh Jesukristo tasxte pa'jwa'jsa txáa pa'ga nwēese'jna üsi'kwe. <sup>7</sup> Açxha' Roma çxhabtewe'sx i'kwe'sx jxukaysa jii naa karta's fxi'jçxa kajaçthu, i'kwe'sxa' Dxus peeygâhçxa txhitxnisai'kwe txáa yakh fxi'zesa. I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristo, txáa pa'ga Dxus yakhçxáa mfxi'zewe.

## Roma çxhabna Pablo u'j wēeni

<sup>8</sup> Jesukristo i'kwe'sxtxi pu'çxpa'ga Dxus yakh i'kwe'sx ew fxi'zeni's mteewa jxukatx ew we'we', txáa pa'ga adxa' Dxusa'sthü weçxá'. <sup>9</sup> Sa' na'wē Dxusa's nakwe wala selpi'th txajx Nçxi'k kaapiya'jni's üusus jxuka yajkxna txáa Dxusa' jiaa' adxa' i'kwe'sx pa'gate bagaçxtewa txáa yakh puutx we'wena nes yuusaatewa. <sup>10</sup> Txáasath i'kwe'sx tasxna yuhwaça' sühçxa Dxus yakh puutx we'wena nes yu'. <sup>11</sup> Sa' kxtee pa'jçxa' Dxus yakh fxi'zewa'ja's i'kwe'sxtxi pu'çxhi'nja sūju'th, jweeifçxáa çxhâçxha fxi'zekahn. <sup>12</sup> Sa' puutx kxteeçxah ya'pu'çxna Dxus yakh çxhâçxha fxi'zewa'ja's ji'phu'nja'w, txáa pa'gatey i'kwe'sxwa Dxusa's yaakxsa i'kwe adx na'wēy.

<sup>13</sup>Yakhhê'jwe'sxtxi pta'sxi'th: i'kwe'sx yakh puutx uyya' yuwe'nja sũhna maz uswa yajkxçawa, âçxpkaçx yujxa' yu' tudunimeeth. I'kwe'sx ksxavxysu Dxus luuçx yuwa'jsa ũstxna txãatx Dxus jii knayya' yuwe'nja sũju'th, ma'wêtkv vxite kiwesuwa Dxus jii knay txã'wëy. <sup>14</sup>Adxa' maa nasatxwa jxuka Kristo yuwe's pta'sxwa'l jipthu, çxhabtewe'sx ma'tx yuu, fxiy we'wesa ma'tx yuu, naa kiwete wala jiisa ma'tx yuu meeçxa' jiimeesa ma'tx yuu nawa ma'wêsatxwa jxuka pta'sxwa'l jipthu. <sup>15</sup>Txãasa adxa' Kristo yuwe ewte nvxiitwa'jsa's pta'sxya' yuwe'nja sũhnaçxãa ũsthu Roma çxhabte i'kwe'sxtxiwa.

### **Kristo' maatxwa jxuka nwe'wewa'jsa'**

<sup>16</sup>Adxa' Kristo yuwe ewte nvxiitwa'jsa's pta'sxya' weh yuhwa thaame'çmeeth, txãa pa'gategy Kristo' Dxus kaahnisa' maatxwa nwe'weya' âjawa'jsa txã'sna ũuste jxpa'gasa yuutxi', judiu ma'tx yuu judiimeesa ma'tx yuu nawa maa nasatxwa jxuka nwe'wewa'jsa'. <sup>17</sup>Aça' nwe'wenisa yuuya', Kristo's ũusuh jxuka yajkxçxa jxpa'gate yuuçxãak Dxus dxi'pte yuuwemée ewsa yuuna ya'pa'ja'. Txã'wë yuua'ja's Dxus librute vxite ajkhêwa na'jĩnak pta'sxi': Dxusa's ũusuh jxuka yajkxte yuuçxãa Dxus yakh fxi'zewa'ja's ya'jip'huna jĩ'k.

### **Naa kiwete nasa' yuuwesata'**

<sup>18</sup>Dxus kastigo seena'sa cieluju yuja' nasa ewmeesa jxukaysawe'sx jii, txãawe'sxa' ewmeete yuuçxãa fxi'zena isasa yu'sa' yupna ũsta' naa pa'ga. <sup>19-20</sup>Txãa ente' Dxus ma'wêsatewa jiimeetha'w yu' jĩya' âjameetxna, txãa pa'gategy Dxus ma'wêsatewa kaajiyu'jsa ũsta' Dxus pheu'lçxa nvxiitnisa txãatx kaajiyu'ju'. Txãa pa'gak naa kiwe's pheu'lçxa nvxiitnijũ' ew ya'jiyu' Dxusa' kĩhtewa jxuka âjawa'jsa bagaçxtewa nes yuua'jsatewa. Aça' txãa ma'wêsaxçawa kaajiyu'jnku txã'wë pheu'lçxa nvxiht. <sup>21</sup>Txã'wë Dxusa' ũsyuhna sũhwa'l yu'sa' jiphuçxawa, isate yu' Dxusa's weçxana nwêese'jmée, naa kiwete kĩh yuhwa seelpimeesaçxá'stxi pakwena jxã'j. Aça' txã'wë yũupa'ga txãawe'sx ũusa' naa kiwete ewmeesa yuuçxá'sku yaakxwa'jsa neeyũ. <sup>22</sup>Txãawe'sx yu' jiitha'w jĩ'tx, nawa jiimeesatx yuuna pa'j. <sup>23</sup>Txã'wë Dxus bagaçxte yuhwa pçuwa'jsamée kĩhtewa jxuka âjawa'jsa' txã'sna neewe'wepkaçxte, naa kiwete pçuwa'jsa nasa na'wë piisaçxatx neewe'wena ũsu'. Sa' txã'wëçxãa yũumée, fxuusa', yu'kh eçx txã'wësa na'wë vxitçxatx neewe'wena ũsu'.

<sup>24</sup>Txã'wë yũupa'ga Dxusa' txãawe'sxtxi' pu'çxmée nvxihtku, peekx ewmée kazx yaakxniçxá's kxtey yuuna fxi'zekahn, kxahtx kĩhwa thaampa'saçxá's puutx ya'ewmée yũuna fxi'ze' teexsa na'wëçxah. <sup>25</sup>Txãawe'sxa' isa Dxus itxisa yu'sa' jxpa'gaya' wa'lçxa, Dxusmeeçxá'stxi jxpa'ga. Txãasatx wejxwa Dxus kĩhnawa jxuka pheu'lçxa nvxiit-sa'sii neewe'wepkaçxte, naa kiwete Dxus pheu'lçxa nvxiitnisaçxá'stxi

neewe'wena fxi'ze'. Txã'wẽ Dxus bagaçxtewa pçuwa'jmeesa's neewe'wewaç, wejx thaakwe ewsa', nawa txã'wẽ yũumeeta'.

<sup>26</sup>Txãa pa'ga Dxusa' pu'çxmée nvxihtku, txãawe'sx ewmée kazx yaakxniçxá's kxtey yuuna fxi'zekahn. Aça' u'y pwe'sxtxi pkal yuuna fxi'ze', txãawe'sx kakwe'síçxáa suwwa'jsana pakwena. <sup>27</sup>Txã'wẽy piçthê'jwe'sxwa nyu yakh zhiçxkwe fxi'zeni yu'sa' nvxihtçxa, puutx piçthê'j pwe'sxtxi pkal thaampa'saçxá's kxtey yuuna fxi'ze', peekx kakwe kazx yaakxniçxá's nwēese'jna. Txã'wẽ yũuçxa peekx kakwejújçxáa ya'kastigâywa'ja's uyu'tx.

<sup>28</sup>Txã'wẽ Dxusa's nwēese'jya' wa'lyã'the', Dxusa' pu'çxmée nvxihtku, txãawe'sx kazx yaakxniçxá's nwēese'jçxa peekx ma'wẽwa ewmée yũuna fxi'zekahn. <sup>29</sup>Txãa pa'gatx ewmeesa yuuçxáa yuuna pa'j: pthãawesa, pkal yuunisa, ewsa's jiiçxawa ewmeeçxáa yũusáa, Dxus yu's yajxkmée ji'phu wēeniçxá's yaakxsa, kīhwa ewmeeçxáa yũusáa, vxitetx açeyaakxsa, nasa ikhsa, puui kiissa, íxhiisa, ewsa yu'sa' weeçxsa, íxhiçxa kaapui'jsa, txã'wẽçxáa yũusaata'. <sup>30</sup>Vxitetx ewmée nuywe'wesa, Dxusna açesa, puutx ya'wēesxusá, peekfiçxáa iwejçx yaakxsa, vxitee dxi'pte iwejçx we'wesa, ewmée yũuwa'j u'sesa pakwena fxi'zesa, neywe'sxtxi nwēese'jsamée, <sup>31</sup>ewsa's jiyuya' wa'lsa, puutx we'weni's kxtey yuusamée, kim yuhnawa peeygāasamée, bagaçxte yuhwa yuwe ewuusamée, kim yuhnawa pu'çxsamée. <sup>32</sup>Txãawe'sxa' wala ew jiita' txã'wẽ ewmée yũupa'ga Dxus kastigote uuwa'ja's. Txã'wẽ ew jiiçxawa, ewmeesa yuuçxáanatx kxtey yuuna fxi'ze'. Sa' ũus yuhwa ji'phmeesa yã'tha', txãasatx vxitesa ewmée yũuçte uyçxa', wejxwa kçxhãaçxha'jna fxi'ze'.

### Dxusa' isak kastigai'

**2** <sup>1</sup>Txã'wẽ ewmée yũupa'ga Dxus kastigo's jxpa'gawa'j ji'phta' jīna idxa' açewe'weçxawa, txãa nasa ewmeesa na'wẽ fiçxáag ewmée yũuna fxi'ze' makwe Dxusa's jiiçxawa. <sup>2</sup>Peekx jiitha'w txã'wẽ ewmée yũusatxi's Dxusa' isak kastigai' maatxwa jxuka. <sup>3</sup>Aça' idxa' txã'wẽ vxitetx açewe'wena Dxus kastigo's jxpa'gawa'j ji'phta' jiiçxawa idxwa txã'wẽyçxáa ewmée yũuçxa', Dxusa' idxa's kastigaimeena ¿sũju'gá'? <sup>4</sup>Txã'wẽ ewmée yũutewa Dxusa' peeygãhçxa açxhíi yu' kastigaimee ũsa'. Nawa txãa yu' idx ewmée yũunitx nvxihtçxa txajx tasxte sxawedkahn ũyhasna iipe'ja'. <sup>5</sup>Txã'wẽ ũyhasna ũstewa, iidx ewmée yũunitx nvxihtçxa Dxus tasxte sxawedwa'j yu'sa' yaaki'çmeeg. Txãa pa'ga ya'kastigâywa'ja's jweefiçxáa nuywalana ũsgu, nmeh ente Dxus kastigâywa'j en ahtewe'sx. <sup>6</sup>Txãa ente' ma'wẽ yũusaçxawa, teeçxsa na'wẽçxah jxpa'gatxna txãawe'sx jī's: <sup>7</sup>bagaçxte yuhwa pçuwa'jsame's een isa pakwena ewçxáa yũuna fxi'zesa' pçumée itxi fxi'zewa'ja's jxpa'gatxna. <sup>8</sup>Naapkaçxha' Dxusa's ahçena txajx jxkaahni yu'sa' kxtey yuumée ewmeeçxáa yũuna fxi'zesa' Dxus kastigo seena' yuhsa's jxpa'gatxna. <sup>9</sup>Maawa ewmeeçxáa yũusa

yuutxi's jxuka kastigāywal'j en pa'jana, judiu jil'mée vxite nasatx yuhwa kastigāyçxa', judiuwe'sx yuutxi' wejx txā'wē kastigaīna. <sup>10</sup>Nawa maawa ew yūuna fxi'zesatxi's Dxusa' ūsuna txāa yakh wēt weçxana fxi'zewa'ja's, judiuwe'sxtxi ūsçxa', judiu jil'mée vxite nasatxwa txā'wēyçxāa ūsuna. <sup>11</sup>Txāa pa'gatey Dxusa' teeçxsaçxāan jxthaakwe ew jxpe'je'çme', jxukaytxi txāa na'wēçxaçxāak jxpe'je'.

<sup>12</sup>Moises leya's jiimeesawa ewmée yūuna fxi'zesa yu' jxukaysa vxituwa'jsa fiçxāata'. Aça' makwe Moises leya's jiiçxawa ewmée yūuna fxi'zesa yu' txāawe'sxwa jxukaysa vxituwa'jsa fiçxāata', txāa leya's nwēese'jmeeçxa ewmée yūupa'ga. <sup>13</sup>Txāa pa'gatey leya's jiipa'gaçxāa ewte ya'neeyū'çme', aça' makwe leya's jiimeeçxawa ley jxkaahnitx kaavxya'ja'jsa yuuçxāa yuuwemée yuua'jsata'. <sup>14</sup>Aça' judiu jil'mée vxite nasa makwe leya's jiimeeçxawa ley jxkaahni Dxus kaaūusuthe'jni's kaavxya'ja'jtx ewmeesa yuutxi' nwēese'jméeh ewsaçxā's kxtey yuuna. <sup>15</sup>Txā'wē yūuwa'ja's Dxusne' kaaūusuthe'je', txāa pa'gatx āate kaavxya'ja'jna ewçxāa fxi'ze'. Txā'wē yūuwa'ja's txāawe'sx ūus yaakxni' kaajiyu'ju'ne' kīh yūuni ewmeesatewa sa' kīh yūuni ewsatewa txā'wēy. <sup>16</sup>Aça' Dxus kaahni Jesukristo kīhçxa', nasaa ūusteçxāa yaakxni's jxuka āate kaajiyu'juna txā'wē yūuwa'ja'sthu adxa' pta'sxi'.

### Judiuwe'sx Moises leya's jil'phsa

<sup>17</sup>Nawa idxa' na'jī'g: judiuth, txāasa Moises leya's jil'ptha'w. Txāa pa'ga Dxusa's jīsath jīçxa iwejçxgu yaaki'. <sup>18</sup>Dxus jxkaahni's jīsag, Dxus leya' kaapiya'ja'k ewsaçxā's txhitxwa'ja's. <sup>19</sup>Yafx jil'phmeesatx jxpe'jsath jī'g, sa' çxhi'dxte fxi'zesatxwa eena'te kutxi'jsath jī'g. <sup>20</sup>Sa' ley jil'ptha'w kxteea' ma'wē fxi'zewa'ja'swa pta'sxi'k ewsaçxāana kxtey yuua'ja's jī'g.

Txāasag ma'wē fxi'zewa'ja'swa kaajiyu'jsath jī'. Sa' pxtaakwesatxwa pta'sxsath, txā'wē yuuya' fiçxāa leya's jil'ptha'w jī'g. <sup>21</sup>Txā'wē vxitetx kaapiya'jaççxa', idx yu' çkīh yūuçxaga piya'çmée? Idxīwa pta'sxçxa': Pesweewa'jme' jī'g sa' idx yu' çkījxa'ga peswé'? <sup>22</sup>Idxī we'weçxawa: Ptamsayā'ja' vxitesa yakh pkal yuua'jme' jī'g sa' çkīh yūuçxaga idx yu' kxtey yu'çmée? Idxīwa Dxus itximeesatxi's açe'g sa' çkījxa'ga Dxus itximeesatx peswé'? <sup>23</sup>Dxus leya's jil'ptha'w sūhna iwejçxgu yaaki', nawa txāa ley jxkaahni's jxuka nwēese'jmeeçxa', Dxusa's açasag. <sup>24</sup>Aça' Dxus librate' isa yuh we'we'k na'jīna: judiu jil'mée vxite nasa' Dxusa's açe'we'we'tx, nawa yuuwesa yu' i'kwe'sxi'kwe jī'k.

<sup>25</sup>Åçxha' na'wē yūunis'a's pta'sxya'wath: Moises leya's nwēese'jna kaavxya'ja'jaççxa yu', cirkuncidāyni's jxpa'gawal'j yuja'. Nawa ley jxkaahnitx jxuka kaavxya'ja'jaçmeeçxa ya'cirkuncidāyte', cirkuncidāynimeesanpa fiçxā'. <sup>26</sup>Aça' cirkuncidāynimeesaçxawa leya's jiisa na'wē ew yūuwa'ja's kxtey yuute yu', cirkuncidāyni na'wēysa fiçxā'. <sup>27</sup>Mpa'yajkxwe. Txā'wēme' cirkuncidāynimeesaçxawa, ley jxkaahnitx

kaavxya'ja'jsa yu' cirkuncidāynisawe'sxtxi ewmeekhē nvxiitutxna, makwe leya's ji'phçxawa jxkaahni's jxuka kaavxya'ja'ja'çmeeeça ya'cirkuncidāyte'. <sup>28</sup>Txā'wē yuwejuçxáa judiuth jīsa judiu ya'yučme!, sa' txā'wēy kakweteçxáa cirkuncidāyçxa judiu ya'yučme!, <sup>29</sup>naasáa ūusuh jxuka Dxusa's yajkxna ew fxi'zeteçxáak judiu na'wē yuh yuuna ya'pa'ja'. Sa' ewmée ūus yaakxni's yu'pthehnisaxçxáa cirkuncidāyni na'wē. Aça' txā'wē ewmée ūus yaakxni's yu'pthehsa yuuçxá'sku Dxusa' weçxá'.

**3** <sup>1</sup>Txā'wēte!, judiuçxáa çkīh wejx thaakwe ewsa ji'phtxna? Sa' ya'cirkuncidāyni' çkihtega selpi'? <sup>2</sup>Txāawe'sxa' ewsa yu'sa' wala ji'phta'. Txāasáí kihtewa thaakwe ewsa Dxus yuwe's ji'phta' txāawe'sxtxi neewe'weçxa nvxiitnisa's. <sup>3</sup>Txā'wē Dxus yuwe thaakwe ewsa's ji'phçxawa judiuwe'sx maáí yu' Dxus yakh fxi'zewa'ja's kxtey yuumeete!, çkīh yuukx? ÇTxā'wē kxtey yuumeeteçxáa çDxuswa kihtewa jxuka pu'çxya' puutx we'weni's pu'çxmée yuuma'k? <sup>4</sup>Txā'wē yuumeena. Makwe naa kiwete nasa' Dxus yakh fxi'zewa'ja's kxtey yuumeetewa, Dxus yu' txajx pu'çxya' puutx we'weni's kxtey yuuna. Dxus txā'wē kxtey yūuwa'ja's we'weçxa!, Dxus libroute na'jī'k:

Txāa ente kxtey yuuni's uyçxa!,

İxsiimée isa yuh we'wesa yu'ga jītxna jī'k.

<sup>5</sup>Kwe'sx ewmée yūunisa' selpi'k txā'wē ewmée yūute fiçxáak Dxusa' txajx peeygāani's jweefiçxáa āate kaavxya'ja'ja'. Txāa pa'ga ewmée yūunisa' seelpisa!, Dxus peeygāani's kaavxya'ja'jsa jī'tx maáí yu'. Txā'wēte!, kwe'sx ewmée yūuni's çma'jītka'w? Kwe'sx ewmée yūunisa' seelpisate!, Dxusa' ewmée yūusatxi's kastigāyçxa!, çDxuswa ewmée yūusaçxa ma'k txā'wē yūu? <sup>6</sup>Weh yuhwa ewmée yūusame!. Dxusa' çma'wē naa kiwete nasa yuuesatx kastigāyya' ājaxk, txāáíwa ewmée yūusaaçxá'?

<sup>7</sup>Txā'wē adx ewmée yūunisa Dxusa's kxtey kxu'ju'jna selpiçte!, çadxa's kījxa'çxáa ewmeeg yūu jīna we'weçxa kastigāikx? <sup>8</sup>Txā'wē yaakxsa!: Ewmeesaçxá's wejx pa'pçxute ewna, ewsa vxyaana nes yuukahn jī'tx. Txāa yu' adxa's açesatx txā'jī!: Pablo' txā'wēk kaapiya'ja' jīna. Txā'wē we'wesa' Dxus kastigo yuuçxá's jxpa'gawa'jsata!.

### Jxukay yuuesatha'w

<sup>9</sup>Na'wē' aça' çjudiuwe'sxçxáa kīh yūuçxa vxite nasate jxthaakwe ewsa yuukxtha'w? Weh yuhwa thaakwe ewsameetha'w. Txā'wē judiuwe'sxçxáa thaakwe ewsa'w sūhwe'sxte kaajiyu'juçthu: judiu ma'k yuu vxite nasa ma'k yuu nawa jxukaysa ewmée pkalsaçxaçxáatha'w. <sup>10</sup>Txajīk Dxus librutewa na'wē we'we'!

Teeçxçxáa yuhwa ewsa yu' meeta!.

<sup>11</sup>Kim yuhwa Dxusa's jiyuçxa pakweya' yaakxsameeta!.

<sup>12</sup>Jxukaysa jxpubaçxa vxituni ūsta!.

Txãasa ew yūuwa'j yu'sa' teeçxçxáa yuhwa yaaki'çmeeta'  
mteewe'sxçxáa yuhwa.

13 Txãawe'sx we'weni' uúsáa pedani kafxa's phadeni na'wē kazxsata'.  
Sa' txãawe'sx thune' ul weeswée weneno na'wē ikhsa', ísxiina  
kaypuba'jçxa.

14 Seená' kazx ewmée we'weni yuuçxá's ji'phta'.

15 Txãawe'sx çxida' nasa ikhya' u'jwa'ja's yuuçxáatx selpi'.

16 Vxitetx nxuste kaafxi'ze'jwa'ja's yuuçxáatx yajkxna fxi'ze'.

17 Ewte kaafxi'ze'jwa'j yu'sa' yaaki'çmeeta'.

18 Dxusa' uyna úsna sūhna ūukhwa'ja's yu' ji'phmeeta' jī'k.

19 Dxus librute na'wē ewmeesata' jīna we'we'k txāa yu' Dxus leya's  
jiisawe'sxtxi we'weçxak txā'jī'. Aça' txāawe'sxa' Dxus yakh pdxi'puwa'j  
en āhte', yuuwemeesatha'w jīna pasya' ājameetxna kim yuhwa. 20 Txāa  
pa'gatey leya'sçxáa yajkxte', maa yuhwa yuuwemée ewsa ya'yu'çme',  
leya' naasáa kíh txā'wē ewmeetewa txā'sna pta'sxsaxçá' naa pa'ga.

#### Yuuwemeesa yuuya' Kristo's jxpa'gawa'ja'

21 Aça' ley jxkaahni's nvxihtçxa yuuwemée ewsa yuuna pa'jwa'ja's  
āçxha' Dxusíi kaajiyu'kh, txā'wē yūuwa'ja's Dxus leyte txāniiteyku  
pta'sxna fxi'jni ūsu' Dxusna selpisaawe'sx fxi'jni. 22 Txā'wē yuuwemée  
ewsa yuuna pa'jya', naasáa Jesukristo yuuçxá's ūsuh jxuka yaakxwa'ja',  
nasa ma'wēsawa jxuka. 23 Txā'wēme' maa yuhwa ewsamée, jxukay  
pkalsaxçaxçáa yuuna pa'jçxa Dxus tasxte pa'jwa'ja's ji'phmée ūsta'.  
24 Txāa pa'gak Dxusa' peeygāhçxa txajx tasxte yuuwemée ewsa yuuna  
pa'khan, Kristo Jesusa's uuwa'j vxit kwe'sx yuuwesatx nwe'wekahn.  
25 Aça' Kristo txā'wē kluuste uunijūk Dxusa's yaakxsa txāniiteywe'sx  
pkal peltunāynimée ūsu'ne'ta txāa pkaltxi Dxusa' peltunāy, aça' txajūtχ  
yuuwemeesa jīni yuu. 26 Sa' naa ensuwe'sx pkaltxiwa txā'wēyçxáak  
Dxusa' txagaçxhíi Kristo kluuste uunijūjχ peltunāyçxa nvxiht,  
yuuwemeesa yuukahn maawa Kristo's jxpa'gawa'jsa yuutxi'.

27 Aça' çkīh yuupa'ga kwe'sxçxáa ewsatha'w sūhna weeçx  
yaakikxtha'w? Txā'wē yaakxwa'ja' pçuk. çKīh yuupa'gaga iiwejçx  
yaakxwa'ja' pçu? Jesusa's ūsuh jxuka yajkxçxa jxpa'ganisa yakha',  
iiwejçx yaakxwa'j kaseje'çme', txāa pa'gak iiwejçx yaakxwa'ja' pçu.  
Txā'wēme' nyafxíi yu' ley jxkaahnitx kxteythu yu' sūhte', iiwejçx  
yaakxwa'jçxáak kaseje'. 28 Txāa pa'ga jiitha'w ley jxkaahni's nvxihtçxa,  
naasáa Kristo yuuçxá's ūsuh jxuka yajkxçxa jxpa'gateçxáa, yuuwemée  
ewsa yuuna ya'pa'ja'k nasa ma'wēsawa jxuka.

29 Dxusa' judiuwe'sxçxáatx pu'çxçxa', judiu jiljmée vxite nasa yuutxi'  
pu'çxwa'jsamée wána açne'kwe i'kwe'sxçxáa iiwejçx yaaki'. Txā'wē  
yuumée judiu jiljmée vxite nasatxwa pu'çxwa'jsaíçxá'. 30 Teeçx Dxusçxáa  
jxukaysawe'sxtxi pu'çxwa'jsa', cirkuncidāynisaçxawa Jesusna ūsuh

jxuka yajkxna jxpa'gateçxáa yuuwemeesa ya'yuuna. Sa' txã'wëy cirkuncidâyimeesaçxawa Jesusna ùsuh jxuka yajkxna jxpa'gateçxáa yuuwemée ewsa ya'yuuna. <sup>31</sup>Txã'wë Jesusna ùste jxpa'gawa'jçxá's pta'sxçxa', ley yu' pu'çxwa'jsame' jïçxa txã'jï'çmeetha'w, wejxwa ley jkkaahni's kxtey yuuwa'ja'stha'w pta'sxi'.

#### Abrahana' na'wëk yuu

**4** <sup>1</sup>Kwe'sx yaçgawe'sx Abrahana's ùs miiyajkxwe wakx: Txã' çkîhga yûu yuuwemeesa yuuna pa'jya'? <sup>2</sup>Abrahana' kîhçxáawa yûuçxa txã'wë yuuwemée ewsa yuuna pa'jwaça', txã'wë yûuçxath ewsa yuuna pa'j sühna iiwejçx yaakxwa'ja's jï'phuwa'j ne' yu'. Nawa kîhwa yûumeexak ewsa yuuna pa'j, naa pa'ga iiwejçx yaakxwa'j jï'phmeek yu'. <sup>3</sup>Txajîk Dxus librute pta'sxçxa': Abrahana' ùsuh yuuçxáak Dxusa' kxtey yuuna sühna yajkx. Txã'wë yaakxpa'gaçxáa ewsa yuuk jï'k. <sup>4</sup>Peekx jii i'kwe: Kîhçxáawa mjïipa'ga dukhnisa' peenisame'; txã' mjïipa'ga dukhnisa', yuula's dewenisa'. <sup>5</sup>Nawa kîh yuhwa yûumeexawa, naasáa pkalsatx nwe'wesa Dxusa's yuuçxáa ùsuh jxuka yajkxteçxáa, Dxusa' txã'sa' yuuwemeesak vxitu'. <sup>6</sup>Txajîk kîh yuhwa yûumeexawa yuuwemeesa yuuçxa weçxana fxi'zewa'ja's Davxida' we'we na'jîna:   
<sup>7</sup>Yuuwemeesag jîna Dxusa' we'wete',  
 Yuuwemée neeyûusaawe'sxa' weçxanatx fxi'ze'.  
<sup>8</sup>Maanawa txãawe'sx pkaltxi khükhte', weçxana fxi'zetxna jï'k.  
<sup>9</sup>Na'wë weçxana fxi'zewa'ja's pta'sxi'k txã' çcirkuncidâynisawe'sx jïiçxáa wáana, meeçxa' cirkuncidâyimeesa'wë'sx jïi yãljçxa wáanax'? çMaa sÿju'kwe? Ew jiyuya' Abrahana's miiyajkxwe. Txã' ùsuh yuuçxáa Dxusa's yaakxpa'ga yuuçxáak yuuwemée yuuna pa'j jï'k. <sup>10</sup>Aça' Abrahana' çbagaçxga txã'wë ewsa yuuna pa'j'? çCirkuncidâyniçjü', meeçxa' cirkuncidâyni'wë wá' yuuwemée ewsa yuuna pa'j'? Ew jiitha'w cirkuncidâyni yuume'ku yuuwemée ewsa yuuna pa'j. Txãa e'suk Abrahana' cirkuncidâyni yuu. <sup>11</sup>Nawa txãa cirkuncision yu' naasáa Dxusa's ùsuh jxuka yaakxpa'ga yuuçxáa yuuwemeesak yuu jîna kakwete snxal ki'pnisaçxá'. Txãa pa'gak Abrahana' tata na'wë kaseje', makwe cirkuncidâyimeesaçxawa Dxusa's ùsuh jxuka yaakxsawe'sx maawa jxukaysatx. Aça' maawa Abraham na'wëy cirkuncidâyimeesaçxawa ùsuh jxuka yaakxsa yuutxi's Dxusa' txã'wëyçxáa yuuwemeesa vxituna. <sup>12</sup>Abrahana' cirkuncidâynisawe'sxtewa isa tata na'wësa yuja', txãawe'sx yuu Abraham na'wëy Dxusa's ùsuh jxuka yaakxwa'ja's jï'phute yu'.

#### Ùsuhçxáa Dxusa's yaakxpa'ga Dxus puutx we'weni' kxtey yuuni

<sup>13</sup>Aytewa Abrahana' na'wëçxáak yuu txã'sna miiyajkxwe: Abraham vxite' txajx jil'jwe'sx jïi Dxusa' puutx we'wek naa kiwe's jxuka txãawe'sxçxaçxáa yamuwa'ja's. Nawa Abrahana' leya's yaakxpa'gaçxáa

txā'wē Dxusa' yamuwa'ja's puutx we'weme', naasáa Abrahamana' úusuh yuuçxáak Dxusa's jxuka yajkx, txāa pa'ga yuuçxáak ewgu yuu jīçxa naa kiwete yamuwa'ja's vxit. <sup>14</sup>Txā'wē leya's nwēese'jsaçxáa naa kiwe's yamuwa'jsawaça', úusuhçxáa Dxusa's yaakxa' yamuwa'jsamée ne'ta yu', aça' kiwe úsu'nja jīna Dxus puutx we'wenisa' kxulne' yuuwa'j yu'. <sup>15</sup>Ley úste!, txā'sna kxtey yuumeçxa', yuuwesak ya'yu'. Nawa ley meete!, çma'wē leya's kxtey yuuya' ya'ájakx?

<sup>16</sup>Txā'wē leymée pa'gafiçxáak Abrahamana' úusuh yuuçxáa Dxusa's jxuka yajkx, aça' txā'wē yaakxpa'gak Dxusa' naa kiwete jxuka yamuwa'ja's puutx we'we Abrahaman ji'jwe'sxtxi. Txāa puutx we'wenisa' leya's ji'phsawe'sx jīçxáa meea', Abrahamana' ma'wēga Dxusa's úusuh yuuçxáa jxuka yajkx txā'wēy yúusawe'sx jīi yā'jçxa. Txāa pa'ga Abrahamana' kwe'sx jxukaysate tata'. <sup>17</sup>Txajīik Dxus librutewa na'jī': Nasa maazkuéesatewa jxukaysate tata yuuwa'jsa idxa's nvxiituçthu jīk Dxusa'. Dxus yakha' kīh yuhwa thēyme'. Txā' uusaatxwa ki' itxi vxitu'k, sa' kīh yuhwa vxyaawa'jmeetewa, kaavxya'ja'ja'k.

<sup>18</sup>Dxus Abrahaman yakh puutx we'wenisa' weh yuhwa kxtey yuuwa'jsamée na'wēçxáak yu'. Nawa Abrahamana' txāa sūhmée Dxus we'weni' kxtey yuuna sūhnaçxáak úuste yu'akh. Aça' Dxus we'weçxa': Iidx ji'ja' iiméh seena' kuh yuutxna jīna we'weni' kxtey yuuyujk. Txāa pa'gak nasa maazkuéesatewa jxukaysate tata yuu. <sup>19</sup>Abrahamana' uuwa'ja'sçxáa yā'kh úythasna úsu', cien anxu ji'phuçyā'kh yu' naa pa'ga. Aça' Sara' bagaçxte yuhwa luuçx ji'phuwa'jsameek yu', txā'wēçxámée thē'khweyā'kh yu'. Makwe txā'wētewa, Dxusa' pu'çxhina sūhwa'j yuuçxá'sku ji'phu' Abrahamana'. <sup>20</sup>Txāasak Dxus we'weni's jxpubana kuh jwed yajkxmée Dxusa' kxtey yuuna sūhna yuuçxáa yajkxna Dxusa's weçxa. <sup>21</sup>Txāa pa'gatey Dxusa' txajx we'weni' yu'sa' jxuka kxtey yuuwa'jsa' sūhna yuuçxáak fxi'ze. <sup>22</sup>Txā'wē Dxus we'weni's ma'wēçxáa yuhwa jxpubamée kxtey yuuna sūhwa'j yuuçxá's úuste yaakxpa'gak Dxusa' Abrahamana's yuuwemeesa vxit. <sup>23</sup>Nawa Abrahamçxáak yuuwemée ewsa yuu jīna fxi'jni yuume'. <sup>24</sup>Kwe'sxtxiwa ja'da we'weçxak txā'jī', txāa pa'gatey kwe'sxwa Jesusa's itxi vxit-sa Dxusa's úusuh jxuka yaakxpa'gaçxáa yuuwemeesatha'w. <sup>25</sup>Kwe'sxtxi yuuwemeesa vxit-ya'fiçxáak Dxusa' Jesukristo's pkalsawe'sx pa'gate uuwa'j vxitçxa ki' itxi vxit.

#### Yuuwemeesa yuupa'ga Dxus yakh fxi'zewa'ja's uyni

**5** <sup>1</sup>Txā'wē Dxusa's úusuh yuuçxáa jxuka yaakxpa'gaçxáa Dxusa' kwe'sxtxi's yuuwemeesak vxit aça' açxha' Dxus yakh wēt fxi'zewa'ja's ji'ptha'w, kwe'sxtxi jxpe'jsa Jesukristo nwe'wepa'ga. <sup>2</sup>Txā'wē Kristo kwe'sxtxi nwe'wepa'ga yuuçxáatha'w Dxus yakh wēt fxi'zewa'the pa'j, Jesukristo's úusuh jxuka yaakxpa'ga. Txāasa açxha'



Dxus tasxte pa'jwa'ja's ji'ptha'w, txāasatha'w wala weçxá'. <sup>3</sup>Sa' Dxus tasxte pa'jwa'ja'sçxáa yajkçxa weçxamée, naa kiwete nxuswa'ja'swa weçxa'tha'w, txāa pa'gatey nxuswa'j en pa'the', jweeíçxáak Dxusa's çhāçxha yaakxwa'j kaseje'. <sup>4</sup>Aça' Dxusa's çhāçxha yaakxwa'j kasehte, Dxus yakh txuteméeek ya'fxi'ze'. Aça' Dxus yakh txutemée fxi'zeçxa', Dxus luuçxtha'w sūhwa'ja's ya'ji'phu'k. <sup>5</sup>Aça' Dxus luuçxyā'ja', weh yuhwa ya'thame'çme', txāa pa'gatey kwe'sx ūuste Dxus Espirituçxáa jxuka khēeçxa ūsna Dxus peeygāniçxá's kaajiyu'jna.

<sup>6</sup>Kwe'sxçxáa yu' ya'nwe'wewa'ja's ājameeyā'the', Kristo naa kiwete kīiwa'j en āhte' pa'jçxa kwe'sx ewmeesa pa'gate uuk nwe'weya'. <sup>7</sup>Kim yuhwa nasa ewmeesatx peeygāhçxa nwe'weya' uumeena. Meeçxa' maafi yu' txā'wē yuuwáatxna, nawa nasa ewsateçxáa txā'wē yuutxna. <sup>8</sup>Kwe'sx yakh yu' txā'wē ewmeesa pa'gate uuwa'ja' wala thēya', nawa Dxusa' kwe'sx ewmeesatewa peeygāhçxa txajx Nçxi'ka's naa kiwete kaakh, ewmeesa kwe'sx pa'gate uukahñ. <sup>9</sup>Txā'wē Kristo kwe'sx pa'gate uupa'ga nwe'wenisatha'w yuu, sa' nmeh ente kastigo iiméh seena'sate yu' wejx nwe'wenisa yu'nja'w. <sup>10</sup>Txāa pa'gatey kwe'sxa' Dxusa's açesateyuhwa, txāa yakh fxi'zewa'ja's vxitku Kristo's uuwa'j vxitçxa, na' açxh yu' Kristo uupa'ga yuuwemeesatha'w na' wejx nwe'wenisa yu'nja'w. <sup>11</sup>Txā'wē yūupa'gatha'w Dxusa's wala weçxá', kwe'sxtxi nwe'wesa Jesukristo' Dxus yakh fxi'zewa'ja's vxitku naa pa'ga.

### Adan yakh Kristo yakha' ja'dameeta'

<sup>12</sup>Pkala' naa kiwete teeçx nasate yuuçxáa u'kaçxak uuwa'ja's vxit, txāa pa'gatx jxukaysa naa kakwe uuwa'ja's ji'phu, pkalte wetepa'ga. <sup>13</sup>Ley kasehmey, pkala' naa kiwete ūsyā'kh yu'. Nawa ley pta'sxçxa: Naa ewmeesa' jīna pta'sx ja'damée yu', ewmeesana sūhwa'ja's ya'ji'phu'çmeene'. <sup>14</sup>Ley yu' meetewa, pkal ūsyā'the ítx Moises meetey Adanwe'sx jxukaysa peekx kakwe uuwa'j ena's ji'phu, Adan na'wēy yu' mée yūuçxa pkalte wetetewa, uu ena' ja'daçxaçxáak pa'j. Ew yajkxte yu', Adana' naa kiwete kīiwa'jsa ūsu'k txāa na'wēsak yu'.

<sup>15</sup>Nawa Adan pkal yakh vxite' kwe'sx ewte neeyūunisa yakha' weh yuhwa ja'dameeta'. Teeçx piçthē'j pkalte wetepa'ga yuuçxáa jxukaysatx uuwa'ja's ji'phu, naapkaçxha' teeçx piçthē'j Jesukristo pa'ga yuuçxáa jxukaysatx txāa pkaluh ewte neeyūuwa'ja's ji'phu. Txā' jxukaysatxku nwe'we naa pa'ga jxthaakwe wala ewsak yu'. <sup>16</sup>Teeçx piçthē'jsa pkal yuuk txāa pkal yakh Dxus ūsku ewte neeyūuwa'ja's txāa yakha' weh yuhwa ja'dameeta'. Txāa pa'gatey teeçxsa teedxi'j pkal yūunisaçxáa maazkuēe us pkalsatewa āhsak yu', naapkaçxha' Dxus ūsku ewte neeyūuwa'ja's txā' maazkuēe pkal ji'phsatewa txāaju yuuwemeesak vxitna pa'j. <sup>17</sup>Teeçxsa yuuwe yuupa'gaçxáa, uuwa'ja' nesku yuuna pa'j. Aça' bagaçxte yuhwa pçuméee ítxi fxi'zewa'ja' wejx txā'wē bagaçxtewa nes yuuna Jesukristopa'ga.

<sup>18</sup>Adan ewmée yūunisa' jxukaysatxku ewmeekhē vxitna pa'lj, naapkaçxha' Jesukristo ew yūunisa' nasa jxukaysatxku yuuwemée ewsa vxit. <sup>19</sup>Txã'wē teeçx piçthē'j Dxusa's nwēese'pha'gameeçxáa jxukaysatx pkalsa yuu, naapkaçxha' teeçx piçthē'j Dxusa's nwēese'pha'gaçxáa jxukaysa yuuwemeesatx yuuna pa'lj.

<sup>20</sup>Kĩhçxah yūunisa txã'wē pkaltewa jxuka ãate jiyukahñ fiçxáak leya' kaseh. Aça' pkala's txã'wē ew jiyuçpkaçxha', Dxus peeygānisa yu' jwee fiçxáak thaakwe wala vxayaa. <sup>21</sup>Pkala' uuwa'ja'sku vxit, naapkaçxha' Dxus peeygāni' pçumée itxi fxi'zewa'ja'sku vxit Jesukristo nwe'wepa'ga.

### Pkala's nwēese'jmée Kristo yakhçxáa itxi fxi'zewa'lj

**6** <sup>1</sup>Dxus peeygāhna peltunāyni' jweefiçxáa nes yuukahñ, çpkalte fxi'zena nesmtha'w yuu? çMaa sūju'kwe'? <sup>2</sup>Kwe'sxa' peena yu' pkalte fxi'zewa'jsameetha'w, txāa pa'gatey pkaluh txuteeçxa peena yu' nwēese'jwa'jsa meeyā'tha'w, sa' çkĩjxa'çxáa jwee pkalte fxi'zena nes yuukxtha'w? <sup>3</sup>Meeçxa' jiyu'çmeewá'kwe, nawa maawa Kristo Jesus yakh fxi'zeyá' yu'te ya'bautisāynijū', Kristo yakh ja'da uusáa na'wētha'w yu'. Yu'te ya'bautisāyni txã'wē Kristo yakh ja'da uuçxa pedaní na'wē yūunisa'. <sup>4</sup>Txāa pa'ga kwe'sxa' uuçxa pedani na'wēsatha'w yuu, aça' Kristowa ma'wēga Dxus pu'çxte uunijūwa ki' itxi yuu aça' kwe'sxwa txã'wēy yuusaatha'w. Txāasa wala ew fxi'zewa'lj jiptha'w.

<sup>5</sup>Kwe'sxa' Kristo yakh ja'da uusáa na'wē yuuçxa, txāa yakh fxi'zena ūstha'w, txāa na'wēy itxi yuuçxa. <sup>6</sup>Txāasa jūitha'w Kristo' kwe'sx pkala's ivxiituya' kluuste uuk, kwe'sxa' peena yu' pkalte fxi'zekahmen. <sup>7</sup>Aça' pkala' peena yu' jxkaajxa' ājawa'jsame', txã'wē uusáa na'wē yuusa yā'txhi's. <sup>8</sup>Txāa pa'gatey kwe'sxa' Kristo yakh ja'da uusáa na'wē yuuçxa āçxha' txāa yakh itxi fxi'zena ūstha'w naa pa'ga. <sup>9</sup>Kwe'sxa' jūitha'w Kristo' uuçxawa ki' itxi yuunijūyā'ja', uu ena' peena yu' pa'ljmeena txā'sa'. <sup>10</sup>Kristo' pkala's nmeh ivxiituya' teedxi'lj yuuçxáak uu, txajūyā'ja' bagaçxte yuhwa peena yu' uuya'mée. Sa' āçxha' Dxus yakh itxi nes yuuwa'jsa' bagaçx entewa. <sup>11</sup>I'kwe'sxwa txã'wēy uusáa na'wēçxáa mfxi'zewe, pkala's peena yu' nwēese'jmée naasáa Dxus yakh yuuçxáa mfxi'zewe, Jesukristo's pi'kçxça.

<sup>12</sup>Pkala' peena yu' jxkaahwa'lj jiphme' i'kwe'sx kakwete, nawa nwēese'jewá'kwe aça' txāaí ki' jxkaajana. <sup>13</sup>I'kwe'sx kakwe's pkalte kselpi'jnuwe, wejxwa Dxus kusete mekselpi'jwe, txāa pa'gatey Dxusa'sçxáa selpiia' sūhçxa ki' itxi yuusáa na'wēsa i'kwe naa pa'ga. Aça' i'kwe'sx kakwe' Dxus kusete ewsa yuuçxáana selpiina. <sup>14</sup>I'kwe'sxa' jii i'kwe, leya' nwe'wewa'jsame', naa pa'ga āçxha' Dxus nwe'wenite ūsi'kwe aça' pkala' peena yu' i'kwe'sx kakwete jxkaahwa'lj jiphme'.

### Dxusa's yuuçxáa selpiia' utxani

<sup>15</sup>Txã'wē leya' nwe'weya' ājāmeeyā'the', çki' pkalteyçxáa fxi'zemtha'w, Dxus nwe'wenite ūsçxawa? Weh yuhwa pkalte fxi'zewa'ljme'. <sup>16</sup>I'kwe'sxa'

ew jii i'kwe, selpiina nwēese!jya' sūhçxa maawa patron tasxte pa!jçxa', txāa yuuçxá's i'kwe nwēese!jna selpi'. Txā'wēyíçxá' pkala'sçxáa nwēese!the', ewmeete vxituwa!jçxáak kaseje!, naapkaçxha' Dxusa'sçxáa nwēese!the', Dxus yakh ew fxi'zewa!jçxáak kaseje!. <sup>17</sup>I'kwe'sxa' nyafxíia' pkala'sçxáa i'kwe selpisáa yu'. Nawa açxha' Dxus pu'çxte!, úusuh jxuka weçxana i'kwe kaapiya!jni ewsa's jxpa'ga txā's yuuçxáana nwēese!jna. <sup>18</sup>Txāasa i'kwe pkaluh txuteyā!jçxa', ew yūuna Dxusna selpiina fxi'zewa!the pa!j. <sup>19</sup>(I'kwe'sx ew jiyukahnthu naa kiwega selpinisa yakh kaaja!da!jçxa pta'sx.) Nyafxíiwa ma'wēkwe i'kwe'sx kakwe's ewmeeteçxáa kseelpi!jna úsu!, txā'wēy açxha' Dxus kusete yuuçxáa ya'mdukhwe i'kwe'sx kakwe's txāa yuuçxá's selpiiya'.

<sup>20</sup>I'kwe'sxa' nyafxíia' ew yūuna fxi'zewa!ja's nwēese!jmée pkalte yuuçxáa fxi'zena úçxa', <sup>21</sup>kxte' çkíjkwe ewsa uy, txā'wē thaampa!teçxáa fxi'zena úçxa'? Txā'wē fxi'zete!, naasáa uuwa!j yuuçxáak vxya'. <sup>22</sup>Nawa pkaluh txuteyā!jçxa', Dxusna selpiwa!the i'kwe pa!j, aça' kxte yuuçxa' ewsa vxyaayuju'fik. Txā'wē yūuçxa', kíh pkal yuhwa ji'phmée fxi'zewa!ja's ya!jypa!ga'k, sa' nmeh ente' bagaçxte yuhwa pçuwa!jmée ítxi fxi'zewa!ja'swa ya!ji'phuna. <sup>23</sup>Txā'wēme!, pkala' naasáa uuwa!ja's yuuçxáak úsu!. Nawa Dxusa' bagaçxte yuhwa pçumée ítxi fxi'zewa!ja'sku peesu!, Kristo Jesus nwe!wepa!ga.

### Ptamuní ley yakh kaaja!da!jni

**7** <sup>1</sup>Yakhthē!jwe'sx maawa leya's jiisa' peekx jii i'kwe leya' naa kiwete nasa nee ítxiyteçxáa jxkaajxa' ajawa!jsa'. <sup>2</sup>Ptamuuçxa fxi'zeni leya's miiyajxwe wakx: U'y iimi'sa' txajx nmi' uu ja'damée yu' vxite yakh iimi'ya' ajāwa!jsame!. Txā'wē txajx nmi' uumeey vxite piçthē!j yakh utxaaçxa fxi'zeçxa', pkal yuusak yu' jī'k. <sup>3</sup>Nawa nmi' uuniijūyā!ja', peena yu' txā'wē jxkaahna nes yuuya' aja'çme!, aça' txajx nmi' uuniijū' vxite piçthē!j yakh iimi'ya' ajawa!ja'sku jxkaaja'.

<sup>4</sup>I'kwe'sxwa txā'wēy Kristo tasxte utxaasá' uusáa na'wēsai!kwe, aça' leya' uusa's jxkaajxa' ajawa!jsame!. Aça' açxha' i'kwe'sxa' Kristo uuçxa ki' ítxi yuuk txajx nasai!kwe, Dxus yuuçxáana selpiina fxi'zewa!jsa'. <sup>5</sup>Txā'wē Kristo tasxte utxamey, kwe'sx ewmée yūuya' yaakxnixt ley pta'sxçxa!: Ewme! jī'k txāatxiçxáak wejx thaakwe yaakx wēe yuu. Aça' txā'wē yaakxpaga Dxus kastigote uuwa!jçxáak yuu. <sup>6</sup>Nawa açxha' leya' kwe'sxtxi thegwa!j ji'phme!. Txāa pa!ga açxha' Dxus Espiritu jxkaahniçxá's nwēese!jwa!j ji'ptha'w, leya's yajkxmée.

### Adx úuste pkal ússa

<sup>7</sup>Txā'wēte!, leya' ewmeesana çsūju!kwe'? Weh yuhwa txā'wēme!. Txāa leya' naasáa kíh txā'wē pkaltewa pta'sxsaçxá!. Ley pa!gameewaça!, adxa! jiyuwa!jmée ne!tka yu' kíh txā'wē pkaltewa. Ley pta'sxçxa!: Vxite jīitx

kusalj wēena ewmēe yūuwa'ja's yajkxna fxi'zewa'jme! jīmeewaça', adxa' jiyuwa'jmēe ne'tka yu' txā'wē yaakxnisa' pkaltewa. <sup>8</sup>Ley pta'sxçxa': Txā'wē yaakxni' ewme! jīnijūk adx ūuste jweeíçxáa ewmēe yūu wēenisaçxáa ūusuthe. Ley txā'jīmeewaça', pkalna sūhwa'j kasehwa'jmeene! yu'. <sup>9</sup>Adxa' nyafxiaa' ley pta'sxni's jiyumey yu', yuuwemeesath sūju'çxáath. Nawa ley pta'sxni's jiyunijūk jweeíçxáa ewmēe yūu wēe yuu. Txāa pa'gath isa yuuwesa ne'tka sūhwa'ja's ji'phu. <sup>10</sup>Txajuth isa ew jiyu, leya' nwe'wepkaçxte, ewmēe yūuwa'ja's kçxhāaçxha'jsaçxáak yuu adx yakha'. <sup>11</sup>Txāa pa'gately pkala' leypa'gafíçxáak jweeíçxáa çxhāçxhaçxa adxa's Dxus kastigote uuwa'j vxit.

<sup>12</sup>Txā'wēçxawa, leya' ewmeesame', txāa pa'gately leya' kīhtewa jxuka ew yūuna fxi'zewa'ja'sçxáak jxkaaja'. <sup>13</sup>Txā'wē leya' ewsaçxa', çma'wēki'k adxa's Dxus kastigote uuwa'j vxit? sūju'th. Nawa ley txā'wē uuwa'j vxitme'. Ewmēe yūu wēenisak Dxus kastigote uuwa'j vxit. Isa ew jiyute yu', ley jxkaahni ewsa's nwēese'jmēe ewmēe yūu wēenisaçxá's nwēese'pha'gak txā'wē pkal yu'. Aça' txāa pa'gak nwēese'jnimeesa' pkalna sūhna jiyunijū' yuuwesa uuwa'j ya'yū'.

<sup>14</sup>Jiitha'w leya' Dxus yakh fxi'zewa'ja's yuh pta'sxi'k. Nawa Dxus yakh fxi'zemēe ewmēe yūuwa'ja'sçxáath yajkxna fxi'ze', naa pa'ga yuuwesa' adxthu. <sup>15</sup>Adxa' jiyu'çmeeth ma'wēçxa ne'tka adxna selpiwa'jsa yu'sa' kxtey yuumeçxa', adxna ewmēe vxitwa'jsa yu'sa' kxtey yu'. <sup>16</sup>Ley pta'sxçxa' ewme! jī'k aça' ewmeesatewa jiiçxath txāa ewmeesa's íçxáa kxtey yu', txāa pa'gath leya' yuuwemeesana sūju'. <sup>17</sup>Peekçxáa txā'wē ya'yū'çmeene!. Adx ūuste ewmeesa ūsna txāane! txā'wē ewmēe yūuwa'ja'sçxáa kaaūusuthe'je'. <sup>18</sup>Txāa pa'gath adx ūuste! kīh yuhwa ewsa yu' meena sūju'. Txajíçxáa ne'tka ewsa's nwēese'j wēeçxawa, kxtey yuuya' āja'çmēe. <sup>19</sup>Naasáa selpiwa'jmeesaçxá's kxtey yuuçxa', selpiwa'jsa yu'sa' kxtey yu'çmeeth. <sup>20</sup>Na'jī'th na!: Adxna ewmēe vxitwa'jsa yu'sa' kxtey yuuçxa', peekçxáa txā'wē ya'yū'çmeene!, adx ūuste ewmēe kaaūusuthe'jsa ūsna txāane! ewmeesaçxá's kxtey yuuwa'ja's kaaūusuthe'je' açne' txā'wē ya'yū'.

<sup>21</sup>Txajíçxáak ewsaçxá's kxtey yu'nja sūhtewa, ewmēe yūuwa'jçxáa kaseje!. <sup>22</sup>Adx yu', Dxus leya's kxtey yu'nja sūhtewa, <sup>23</sup>adx ūuste ewmeesa ūsna txāak ew yūuwa'ja's kaaūusuthe'je'çmēe. Txāasak adxa's ewmeete yuuçxáa jxpe'je'.

<sup>24</sup>Adxa' seena' yuh āhmeesath. Aça' adxa's çkim nwe'wekx naa kakwe na'wē uuwa'the yuuçxáa pe'jna u'jweça' txāajū? <sup>25</sup>Txā'wētewa Jesukristo' pejka nwe'wek txāajū, txāa pa'gath Dxusa's wala weçxá'. Txā'wēme!, nyafxíi yu' Dxusa's selpi'nja sūhçxawa, adx ūuste ewmēe yūuya' yaakxniçxá'sthu selpi'.

### Dxus Espiritu's nwēese'pha'ga Dxus yakh fxi'zewa'kh kaseje'

**8** <sup>1</sup>Txā'wē Kristo Jesus nwe'wepa'ga, kwe'sx kakwe ewmēe yūuya' yaakxni's nwēese'jmēe naasáa Dxus Espirituçxá's nwēese'jna

fxi'zesawe'sx yakha' āçxha' kīh kastigo yuhwa meea'. <sup>2</sup>Txāa pa'gatey Dxus Espiritu itxi kaafxi'ze'jwa'jsa' nwe'wek txā'wē pkalteçxáa fxi'zenijū, sa' uuwa'theçxáa yāļ ūstewa txāajūwa nwe'wek, Kristo Jesus yakh fxi'zepa'ga. <sup>3</sup>Moises leya' kwe'sx kakwe ewmée yūunijū txuhdeya' ājameeyā'the', Dxusa' txajx Nçxi'ka's kaakh nasaa kakwe's ūsçxa. Aça' txāa kakwe yakh kluuste uuçxak pejka nwe'we, pkala' peena yu' ewmée yūuna kaafxi'ze'khamen. <sup>4</sup>Txā'wē kluuste uuçxak kwe'sxtxi nwe'we, kwe'sx kakwe ewmée yūuya' yaakxni's weh yuhwa nwēese'jmée Dxus Espirituçxá's nwēese'the', Dxus leya' kíhtewa jxuka ew yūuna fxi'zewa'ja'sçxáak jxkaaja' txā'sna pejka kxtey yuuya' ājakahn.

<sup>5</sup>Txāa pa'gatx ewmée yūuna fxi'zenijū nwe'wenisa' Dxus yakh fxi'zewa'jçxá's yajkxna fxi'ze', naapkaçxha' ewmée ūus yaakxni's yu'pthehnimeesa' ewmée yūuwa'ja'sçxáatx pa'pçxuna fxi'ze'. <sup>6</sup>Aça' ewmée yūuwa'ja'sçxáa pa'pçxute', Dxus kastigote uuwa'jçxáak kaseje'. Nawa Dxus Espiritu's nwēese'the', ūuste wēt fxi'zewa'kh kaseje'. <sup>7</sup>Txā'wē ewmée yūuwa'ja'sçxáa pa'pçxusa', Dxusa's açesata'. Txā'wēçxaítx Dxusa's nwēese'je'çmée, sa' leya'swa kxtey yuuya' āja'çmeeta'. <sup>8</sup>Txā'wē ewmée yūuya' yaakxni's yu'pthehnimeesa' Dxus yakh iwehdxí fxi'ze'çmeeta'.

<sup>9</sup>Nawa i'kwe'sxa' Dxus Espiritu's ūuste ji'phçxa', ewmée yūuya' yaakxni's nwēese'je'çmeei'kwe, naasáa Dxus Espirituçxá's i'kwe nwēese'je'. Aça' Dxus Espiritu's ūuste ji'phmeesa' Kristo jīimeeta'. <sup>10</sup>Nawa Kristo' i'kwe'sx ūuste fxi'zena ūste', makwe kakwe yu' pkalpa'ga uuwa'jsatewa Dxusa' i'kwe'sxtxi' ki' itxi vxituna, txāa pa'gatey Dxusa' i'kwe'sxtxi yuuwemeesak vxit naa pa'ga. <sup>11</sup>Txā'wē Kristo Jesus uunijūwa ki' itxi vxit-sa Dxus Espiritu' i'kwe'sx ūuste fxi'zena ūsçxa', i'kwe'sx uutewa ki' itxi vxituna petx kakwe yā'jçxa.

<sup>12</sup>Txāa pa'ga Dxus Espirituçxá's nwēese'jna fxi'zewa'jsatha'w, ewmée yūu wēenisa's nwēese'jwa'j ji'phmeetha'w. <sup>13</sup>Txā'wē ewmée yūu wēenisa's nwēese'jna fxi'zeçxa', bagaçxte yuhwa Dxus yakh fxi'zewa'jmeete u'jwene'kwe. Nawa Dxus Espiritu pu'çxte ewmée yūu wēenisa's nwēese'jmée jxukate nvxihtçxa', bagaçxte yuhwa pçumée itxi fxi'zewa'the u'jwene'kwe.

<sup>14</sup>Aça' maawa jxukaysa Dxus Espiritu jxpe'jnisa' Dxus luuçxta'. <sup>15</sup>Ew mjiyuwe: I'kwe'sxtxi jxpe'jsa Dxus Espiritu' nyafxíí ley ma'wēga seena' jxkaaja' txā'wē seena' juuna' jxkaahwa'jsame', wejxwa Dxus luuçx yuukahn pu'çxsaçxá' ūukhmée weçxana fxi'zekahn. Txāasaiík kwe'sx ūuste na'wēçxáa kaaūusuthe'je' Dxusa' kwe'sx Tatana sūhwa'ja's. <sup>16</sup>Txāasak Dxus Espiritu' kwe'sx ūuste khēeçxa kwe'sxtxi kaaūusuthe'je' Dxus luuçxtha'w sūhwa'ja's. <sup>17</sup>Txā'wē Dxus luuçx yā'ja', Dxus jī's jxuka jxpa'gawa'jsatha'w. Dxusa' txajx jīi yu'sa' jxuka Kristo's ūsuna txā'sna kwe'sxwa jxpa'ga'nja'w Kristo yakh ja'daçxah. Nawa Kristo yakh pthaa yuwa'ja's ji'phuçxa yuuçxáa cielute txā'wē jxpa'ga'nja'w Kristo yakh ja'daçxah.

18 Cielute txã'wẽ seena' wēt wēt-sa's jxpa'gawa'jsatha'w, txãasa naa kiwete pxthaa yuunisa's le'çxkuẽçxáa yuhwa yaakxwa'j ji'phmeene'tka'w sũju'th. 19 Txãa pa'gafiçxáatx Dxus pheu'jçxa nvxiitnisa kījkihwa jxuka txakwe wala ñythasu', ãçxhíi yu' txakwe wala nxusna ñsçxawa, Dxus luuçx jxukaysatx jxukate nwe'wewa'j en seena' zhiçxkwe yũuwa'ja's. 20 Txã'wẽ Dxus pheu'jçxa nvxiitnisa kījkihwa jxuka nxusna ñskahníi jxukatx ewmeeteçxaçxáa nvxiitni neeyũu. Txãasatx Dxus nwe'wewa'j ena's txakwe wala ñythasu', Dxus pheu'jçxa nvxiitnisa' peekçxáa txã'wẽ ewmeete neeyũumeeta', Dxusa' ma'wẽ nwe'wewa'ja'swa jiiçxane' ewmeete weteyã'the', txagaçxhíi yu' nwe'wemée kxtee nvxiht. Txãa pa'gatx txakwe wala nxusu'. 21 Aça' Dxus nwe'wewa'j en ähte', txajũ yuuçxá' kījkihwa jxuka ãçxh na'wẽ ewmeete ñsta' txãajũ nwe'weni yuutxna Dxus luuçx yakh ja'daçxah. 22 Jiitha'w ãçxhíi yu' kīhwa jxuka wala yuh seena' pxthaa yuuna u'y nasate yaakasá na'wẽ pebeena ñsta'. 23 Nawa Dxus pheu'jçxa nvxiitnisaçxáamée txã'wẽ pxthaa yuuna ñsta'. Kwe'sxa' Dxus ñsni yu'sa' jxuka jxpa'gawa'jsaçxa nyafxte ñsni txajx Espiritu's jxpa'gayã'tha'w. Nawa kwe'sxwa ja'da pxthaa yuuna ñstha'w, kwe'sx kakwe ki' itxi yuuwa'j en ähte Dxus luuçx jxukaysatx jxukate nwe'wewa'j ena's ñythasna. 24 Txã'wẽ kwe'sx kakwe ki' itxi yuuwa'jsate fiçxáak Dxusa' nwe'we, aça' itxi yuuwa'ja's jiiçxatha'w ñythasu', txã'wẽ yuuwa'j en pa'jyujuna sũhna. 25 Txã'wẽ itxi yuuwa'ja's jiimeewaç'a, çkijxa'çxáa ñythasukth'a'w? Nawa txã'wẽ yuuwa'j en ähmeya', nawa e'suçxáawa äayujuna sũhnatha'w ñythasu'.

26 Txãa pa'gafiçxáak Dxus Espiritu kwe'sx ñuste khẽeçxa pu'çxna kçxhãaçxha'ja'. Kwe'sxa' Dxus yakh ma'wẽ puutx we'wewa'ja'swa jiimeeçxa sxiiguçtewa, Dxus Espiritu' kwe'sx pa'gate Dxus dxi'pte wala pa'pçxu'k iiméh wala nxus yajkxna. 27 Aça' Dxusa' ñus yaakxni's jiisa', txãasak Dxusa' jiyu txajx Espiritu yaakxni's, Dxus Espiritu' naasáa Dxus kxtey yuuwa'ja'sçxáak jxthãasu' kwe'sx jxukaysa pa'gate.

### Kīh yuhwa txuhdemeetxna Dxus yakh fxi'zesatx

28 Kwe'sxa' nxuswa'j ena's yaakxwa'j ji'phmeetha'w, txãa pa'gatey en ma'wẽsawa pa'jçxawa, txãa yu' jxuka selpiwa'jsaçxaçxáata' Dxusna yaakxsawe'sx yuutxi's txã'sa' ew jiitha'w. Sa' txãawe'sxtxi' kīh yuuya' ne' Dxusa' txhitx txãa yu'sa' kxtey yuuna. 29 Txãasaáik maaçxah ne'ta txajx tasxte pa'jwa'jsa yu' txãa yuutxi' jxuka jiyuçxa nyafxíi entey txhitx txajx Nçxi'k na'wẽy yuukahn, aça' txajx Nçxi'k yu'sa' nyakh nthẽ'jsa yuuwa'jsak vxitçxa nvxiht. 30 Sa' txajx txhitxhnisatxi's txajx tasxte nuypa'kh, sa' txajx tasxte pa'jsatxi's yuwemeesak vxit, sa' yuuwemée vxitnisatxi's txajx Nçxi'k yakh ih ñswa'jsak vxit.

31 Dxusa' kwe'sxtxi's txã'wẽ seena' ew yũute', çkim kwe'sxtxi' ewmeete nvxiht-ya' äjajx? 32 Dxusa' txajx Nçxi'ka's yuhwa ñçxhi'dxmée kwe'sx

jxukaysa pa'gate kluuste uuçxa nwe'wekahn ũsku. Txajx Nçxi'ka's yuh ũsuççxa', kwe'sx kījwe peejini yu'sa' wejx thaakwe thēymée ũsuna. <sup>33</sup>Dxus txhitxhçxa yuuwemée vxitnisatxi', çkim ewmeesata' jīya' ājakk? <sup>34</sup>Kristo' kwe'sxtxi nwe'weya' uuçxa ki' itxi yuuçxa āçxha' Dxus paçu ju'gte ũsa' kwe'sx ju'gu we'we pu'çxna, aça' çkim kwe'sxtxi ewmeete nvxiht-ya' ājakk? <sup>35</sup>Na'wē' aça' Kristo peeygāanisatxi's çkihçxá' txajū txuhdeya' ājama'k? Meeçxa' nxuswa'j en, yaaçewa'j en, pkxuua'j en, wēje en, sūpçxçáa nvxiitwa'j en, ũukhūukhte yuuçxáa fxi'zewa'j en, ikhte uuwa'j en kīhwa thēysa pa'jana. <sup>36</sup>Txajík Dxus librutewa txā'wē yūuwa'ja's we'weçxa' na'jī':

Dxus yakh fxi'zepa'ga ikhte uuwa'jsaçxáatha'w,

Piisakuē's ikhya' jxūna u'jnisa na'wē kīh entewa jī'k.

<sup>37</sup>Makwe txā'wē seena' yuuwa'j en pa'thewa, txāatxi' jxuka knaywa'jsatha'w, kwe'sxtxi peeygāasa Kristo pu'çxpa'ga. <sup>38</sup>Txāa pa'ga Dxus peeygāanjū' kīh yuhwa txuhdeya' ājawa'jsame's ew jiith: uu en ma'k yuu, meeçxa' naa kiwega itxi fxi'zewa'j ma'k yuu, Dxus angeleswe'sx ma'tx yuu, eçxthē'j angeleswe'sx ma'tx yuu, meeçxa' eçxthē'j yuu ma'k yuu, meeçxa' āçxh naa ensu nakwe seena' yuuçta' txāa ma'tx yuu, meeçxa' vxite en seena'sa yuhna txāa ma'tx yuu, <sup>39</sup>meeçxa' infxiernojuwe'sx seena'sa ma'tx yuu, nawa Dxus peeygāanjū' kīh yuhwa txuhdeya' ājameena, txāa pa'gatey kwe'sxtxi jxpe'jsa Kristo Jesus nwe'wenisa yā'tha'w naa pa'ga.

### Dxus Israelwe'sxtxi txhitxhni

**9** <sup>1</sup>Adx jī'j judiuwe'sxtxi iiméh wala peeygāhna bagaçxtewa adx ũuste nxusna yuuçxáath fxi'ze'. <sup>2</sup>I'kwe'sx pa'gate adxa' Kristo yakh ũswa'ja's ivxiitute', i'kwe'sx jxukaysa ewte neeyūune'jwaça', adxa' peeygāaweete kxtey yu'nja sūju'th. <sup>3</sup>Adxa' i'kwe'sxtxi txā'wēth wala peeygāja' jīçxa' isxiçxa txā'jīçmeeth, txāa pa'gatey Kristo yakh fxi'zesaçxa' Dxus Espiritu kaaūusuthe'jñiçxá'sthū we'we'. <sup>4</sup>Adx jī'jwe'sxa' Dxus txhitxhnisata', naa pa'ga Dxus luuçxta'. Txāapa'gak Dxusa' txāawe'sx ksxavxyte pi'kxna ũsu' eena' kweethna. Sa' ma'wēçxah pu'çxwa'ja'swa puutx we'wek. Leynawa ũsku. Dxuus yatte ma'wē yūuwa'ja'swa pta'sxku. Sa' kiwe's jxuka yamuwa'ja'swa puutx we'wek. <sup>5</sup>Txāawe'sxa' nyafxte Dxus txhitxhnisa Abrahan jī'tha', aça' txāawe'sx jī'thek Kristo upxhna ũsu' nasaa kakwe yakh. Txāa Kristo' Dxusīçxáak yu', bagaçxtewa tuuthe'jni yuuwa'jsa.

<sup>6</sup>Israelwe'sxtxi Dxusa' nwe'weya' puutx we'wek txā'sa' kxtey yuumée yu' yuume'. Israel jī'j judiuwe'sxa' maai' yu' Dxus luuçx yu'çmeeta', txāa pa'gaçxáak maai' yuutxi' kxtey yuumée. <sup>7</sup>Txā'wēy Abrahan jī'jwa jxukay yu' Dxus txhitxhnisa yu'çmeeta', txajík Dxusīwa na'jīna āate pta'sx: lidx nçxi'k Isaakte upxsaçxáa iidx jī'j adx txhitxhnisa yuutxna jī'k. <sup>8</sup>Aça'

Abrahan ji'tha'w naa pa'ga Dxus txhitxhnisatha'w sūhwa'ja's ji'phmeeta' jxukay yu', naasáa Dxus puutx we'wenite upxsaxáa Abrahan ji'tha'.

<sup>9</sup>Txāa pa'gatey Dxusa' na'l'jīnak Abrahan yakh puutx we'we: En āhte', sxawedu'nja, aça' Sara' teexç nçxi'k ji'phuna jik.

<sup>10</sup>Txā'wē Isaak upxwa'ja'sçxáa we'wemée, Rebeka nçxi'k e'zsa upxwa'ja'swa we'wek. Txāawe'sx neya' Isaaku yu', kwe'sx yaçgawe'sx.

<sup>11</sup>Sa' txāa e'z nçxi'ksa upxyuumeyna, Dxusa' txhitxhku txāawe'sx ma'wē yūuna fxi'zeni's uymeyçxawa. <sup>12</sup>Txāasak Dxusa' na'wē we'we Rebeka's:

Nyakh yaçtewe'sxa' e'stewe'sxa's selpisáa yuuna jīnak we'we. Ew jiyute yu', Dxusa' ew yūusaçxáatx txhitxhwa'jsa yu'çme', maatxwa txajx wedxni yuutxi' txhitxhwa'jsaçxáak yu' txā'wē yūuwa'ja's kaajiyu'jnak makwe judiu ji'thewa pxakh e'zīi yuutxi' txhitxhmée, teexçsaçxáana txhitxh. <sup>13</sup>Aça' Dxus librutewa txā'wēyçxáa we'wena fxi'jni ūsa': Jakob'a's peeygāhth, nawa Esau'a's peeygāhmeeth jī'k.

<sup>14</sup>Dxusa' çewmeesaçxa ma'k txā'wē ma'wēsaxwa txhitxhi'? Ewmeesa yu'çme'. <sup>15</sup>Txā'wēmeeçxafiik Moisesa's na'l'jīna we'we: Adxa' ma'wēsanawa

peeygājaçxá'nja, sa' txā'wēy ma'wēsanawa pu'çxhiçxá'nja jī'k. <sup>16</sup>Txā'wē kwe'sx kīhçxáawa pa'pçxuçxa Dxus peeygāni's ya'jypa'ga'çme'. Kwe'sx kakweju kīhwa pa'pçxumeetewa Dxusa' peeygājaçxáak maatxwa.

<sup>17</sup>Dxusa' ma'wēsanawa peeygājaçxáana, sa' txā'wēy wa'l'wala'jsa yu'sa' ma'wēsanawa kxtee nvxiituçxáana. <sup>18</sup>Txāasaíi Egipto kiwete jxkaahsa's Dxus librote pta'sxi'k na'l'jīna: Idxa's jxkaahwa'jsath vxit, adx kījxa'wa jxuka ājani's iidxp'a'ga nasa jiyukah, sa' adxa's kimtewa naa kiwete jxuka jiyukahnthu idxa's txā'wē yūu jī'k.

<sup>19</sup>Txā'jīte', na'wē yaakine'ga: Dxusíi ne' ma'wē yūuwa'ja'swa vxitu', aça' kwe'sxa' yuuwemée ne'tka'w sūjune'ga. <sup>20</sup>Nawa ūus miiyajkx: Kwe'sx ma'wē

yuuwa'jsatewa Dxusa' jiiçxane' txā'wē yū', aça' idxa' txā'wē yaakxwa'j ji'phmeeg. Kiwe mitxha' çKījxa'ga adxa's txā'wē umu'? jīsaate jiimeetha'w.

<sup>21</sup>Mitxh umsa' ma'wē mitxha's umweçxtewa txajx wedxni yu'sa' vxituçxáana, txāa kiwe's fiçxáa ewte selpiwa'jsa, vxite' ewmeete selpiwa'jsa.

<sup>22</sup>Dxuswa nasatxi' txā'wēyku vxit. Sa' maafitxi's wa'l'pa'ga kastigo seena'sate ūswa'jsa vxitçxawa, peeygāhçxa makwe txaçxwa ūythasku dud yu' kastigaímée. <sup>23</sup>Sa' vxite wa'lsameetxi's ēe walate seena' zhiçxkwesa's

jxpa'gawa'jsak vxit, txā'sna jxpa'gawa'jsatxi' nyafxíi enteyku txhitxh. Aça' kxteewe'sxa' kwe'sxtha'w txajx peeygāanisa. <sup>24</sup>Dxusa' maatxwa

txhitxhwa'jsaçxá', txāasaíik maafitxi' judiu jil'jtxwa txhitxh, sa' judiu jil'jmée vxite nasatxwa txhitxhku. <sup>25</sup>Txā'wē maatxwa txhitxhwa'ja's Oseas

librote na'l'jīnak we'we':

Adx txhitxhnimeesatewa, adx nasa vxitu'nja.

Sa' adx peeygāanisameetewa, adx peeygāanisa vxitu'nja jī'k.

<sup>26</sup>Sa' nyafxíi we'weçxa': Adx luuçxmée i'kwe jīçxawa, txāa e'su': Dxus itxisa luuçx yuune'kwe jīna we'wena jī'k.



27 Nawa Israelwe'sxtxi we'weçxa' na'jì'k Isaiasa': Israelwe'sx ji'ja' kwet muse na'wē seena' kuhsaçxawa, kuhméeçxáa ewte neeyüutxna. 28 Ewsa' kuhméeçxáa yuukahníi wa'lsatxi's dud ivxiituna Dxusa' jì'k. 29 Txã'wē yūuwa'ja's we'weçxak Isaiasa' na'jì':

Dxus kīhtewa jxuka ājasa judiu ji'jtx mazkuē nvxihtmeewaça',  
Sodoma vxite' Gomoçxa çxhab na'wē jxukate vxituwa'jsa ne'tka'w  
yu' jì'k.

### Yuuwemeesa yuuya' Kristoçxá's jxpaga'ni

30 Āçxha' na'wē yūuni's miijajkxwe: Judiu ji'jmée vxite nasa' yuuwemeesa yuwa'ja's pakwesameeçxawa, Kristo's ūuste wa'lmée jxpaga'gasa yuupa'gaçxáa yuuwemeesatx yuuna pa'j. 31 Naapkaçxha' Israelwe'sxa' yuuwemeesa yuuna pa'jya' sūhçxa leya'sçxáatx kxtey yuuya' yajkx. Nawa leya'sçxáa yajkxçxa', yuuwemeesa yuuya' ājameeta'. 32 ¿Kīh yuuçxata ājamée? Yuuwemeesa yuuya' Kristo's ūusuh jxuka yajkxçxa jxpaga'gameeta' naa pa'gatx ājamée. Kristo's ūusuh jxuka yaakipkaçxte, leya'sçxáatx yajkxna ūsu', txāsatx wala jxpuba. 33 Txã'wē jxpubawa'ja's Dxus librute na'wē pta'sxna fxi'jni':

Adxa' Jerusalen çxhabte kwet ki'puçthu, maaítixi' kaypuba'jçxa  
pētxwa'jsa.

Nawa maawa txã'sa' jxpubasamée yu', nxuste neeyūumeetxna jì'k.

**10** 1 Yakhthē'jwe'sxtxi isath we'we': Israelwe'sx ewte neeyūuwaça' sūhçxath ūusuh jxuka Dxus yakh puutx we'we'. 2 Adxa' jiith Israelwe'sxa' wala yuh Dxusa's pakwena pa'pçxuna fxi'ze'tx, nawa ma'wē Dxusa's pakwewa'ja'swa ew yu' jiimeeta'. 3 Txã'wē ew yu' jiimeeçxaítix yuuwemée ewsa yuuya' sūhçxa txāawe'sxtxi ma'wēne' ew thegu' txã'sçxáanatx kxtey yuu wēje', Dxusna ma'wē pakwewa'ja'swa Dxusíi pta'sxna nvxihtku txāa yu'sa' kxtey yuumée. 4 Txã'wē Moises ley jxkaahwa'j en skhēwnijū' Kristo jxkaahwa'jsa', yuuwemée ewsa vxit-ya' ājawa'jsa txã'sna jxpaga'gasa yuutxi's. Nawa txã'sna pakwemée leya'sçxáa kxtey yuu wēete', yuuwemeesa ya'yu'çme'.

5 Txajik ley jxkaahni's nwēese'jçxa yuuwemée ewsa yu'nja sūhna yaakxsatxi's Moisesa' na'jīna fxi'j: Maawa ley jxkaahni's jxuka kxtey yuusa' een isa ew fxi'zewa'jçxá's ji'phutxna jì'k. 6 Nawa yuuwemée ewsa yuuna pa'jya' yu', Kristo's ūusuh jxuka yaakxwa'ja's Dxus librute na'wēk pta'sxi': Kristo' kījxá'kh aça' cielun pe'jya' u'ljwa'ja's yaakxwa'jme'. 7 Sa' txã'wēy Kristo' itxi yuuyá'kh aça' pedaniikhēwa pe'jya' u'ljwa'ja's yaakxwa'jme'. 8 Txã'wē thēysa's yaakxkahmeníi, Dxus yuwe ewsa' iidx yuwete ih ūsa', thēymée ūuste khēeya' jì'k. Dxus yuwe iidx yuwete ih ūsa' jì'k txã'sna thēymée jxpaga'gawa'ja'stha'w pta'sxi'. 9 Aça' na'wēçxáa myūu: Dxus Nçxi'k Jesukristo uutewa Dxusíi ki' itxi vxitku sūhwa'ja's ji'phuçxa Kristo yuuçxá's nwēese'jya' jxpaga'gawa'ja'. Txã'wē yuuçxa'

ewte neeyũune'ga. <sup>10</sup>Txã'wẽ ewte neeyũuya', Jesukristo's ũusuh jxuka yajkxçxa jxpa'gawa'ja', sa' äatewa tuuthe'jwa'ja'.

<sup>11</sup>Kristo's ũuste jxpa'gasatxi's Dxus librute na'wẽk we'we': Txã'sa' ũuste jxpa'gasa' maa yuhwa nxuste neeyũumeetxna jĩ'k. <sup>12</sup>Sa' judiu jil'j vxite' judiu jil'jmeesawa txãa na'wẽçxaçxáa yuuwemée ewte neeyũuwa'jsata', txãa pa'gatey Jesukristo' jxukaysatx nwe'wewa'jsa'. Aça' txã'sna neewe'wesa yuutxi'sa' maatxwa jxukaysatx pu'çxwa'jsa'. <sup>13</sup>Txajíik Dxus librute na'wẽ we'we': Maawa jxukaysa ũusuh yuuçxáa jxuka yajkxna Dxusa's neewe'wesa', yuuwemée ewte neeyũutxna jĩ'k. <sup>14</sup>Nawa çma'wẽ neewe'weya' äjatxki, txã'sa' ũuste jil'phmeeçxa'? Sa' çma'wẽ ũuste jxpa'gaya' äjatxki, txã' nwe'wesa' jina pta'sxni's iiwese'jmeeçxa'? Sa' çma'wẽ wese'jya' äjatxki, kimwa txãa yuwe's pta'sxmeete'? <sup>15</sup>Sa' çma'wẽ txãa yuwe's pta'sxya' äjatxki, kimwa kaahmeete'? Txãa yuwe's pta'sxsatx we'weçxa', Dxus librute na'jĩ'k: Yuwe ewsa's pta'sxna pa'jni' wala yuh ewsa', txãa pa'gatey weçxana fxi'zewa'ja'stxi pta'sxi' jĩ'k.

<sup>16</sup>Txã'wõtewa, jxukay yu' jxpa'ga'çmeeta' ewte neeyũuwa'ja's pta'sxtewa. Txajíik Isaiaswa na'wẽ we'we: Kwe'sx pta'sxni Dxus yuwe's çkimçxá' nwẽese'jçxa kxtey yuuta'? jĩ'k. <sup>17</sup>Txã'wẽ Dxus yuwe pta'sxni's ew jiyunijúk ũusuh jxuka jxpa'gawa'j kaseje', aça' txãa pta'sxnisa yu' Kristo'sku we'we'.

<sup>18</sup>Txã'wẽ pta'sxtewa meeçxa' çwese'jmeewá'ntakx? Pejka wese'jyuh ne'ta, txajíik Dxus librutewa na'jina we'we':

Txãawe'sx pta'sxni's jxuka ya'wese'kh.

Naa kiwete mtee mteewa jxuka pa'kh jĩ'k.

<sup>19</sup>Makwe txã'wẽ yuutewa, Israelwe'sx yu' çjiyumeewá'ntakx?

Txãawe'sxa' jiyuyuhne'ta, nawa jxpa'gameeta'. Txãawe'sxwa jiyumée yu' neeyũumeene'ta. Txajíik Moisesa' Dxus we'weni's na'wẽ pta'sxi':

Adxa' vxite nasatx ew yũuçxa i'kwe'sxtxi kuh kaayaki'jinja,

Aça' ũusçxawa'ja's uyuune'kwe, nasa Dxusa's jiimeesa ũsta'

txãawe'sxtxi adx luuçx vxitpa'ga jĩ'k.

<sup>20</sup>Isaiaswa Dxus we'weni's na'wẽk äate pta'sxi':

Adxa's pakwena pa'pçxumeeçxawa, uytxi.

Aça' adxa' äate vxyaath paapêjxna adxna pakwemeetewa jĩ'k.

<sup>21</sup>Nawa Israelwe'sxtxi we'weçxa' na'jĩ'k Dxus librute:

Adxa' pa'yana nesthu yu' nasa wa'lsatx jĩ'k.

### Israelwe'sx jxukate yu' vxitunimée

**11** <sup>1</sup>Txã'wẽ pa'yatewa pasmeeyã'the', Dxusa' txajx txhitxhnisa Israelwe'sxtxi' çahçema'k? sũju'th. Nawa weh yuhwa txã'wẽ yuume'. Txã'wẽ ahçemeeçxaíik adxa' Israel nasa, Abrahan jil'j, Benjamin nçxi'ktewe'sxthu nawa nwe'we. <sup>2</sup>Dxusa' Israelwe'sxtxi nyafxiitey txhitxçxa, açxpkaçx ahçemée iipe'ja'. I'kwe'sxa' jiine'kwe Dxus yuwe

pta'sxsa Elias Dxus yakh puutx we'weni's. <sup>3</sup>Kxte' na'jĩ'k: Iidx yuwee pta'sxsatxi's ikhtxi sa' iidx altalnawa jxuka ivxiitux, naasáa adx yuuçxáath neeyũu. Nawa adxnawa ikh wēje'fíçxáatx jīte', <sup>4</sup>Dxus paççxa': Dxus itximeesa Baal tasxte peeçxūkwesamée siete mil nasa txhitxhçxa ji'pthu adx jīi, aça' adxçxáath neeyũu sūhwa'j ji'phmeeg jīk. <sup>5</sup>Naa ensuwa txā'wēyçxáa Israelwe'sx maaíi yu' Dxus txhitxhnisa ūsta' txajx peeygāanisa. <sup>6</sup>Dxusa' peeygāhçxa txhitxhku. Nawa ew yũuna fxi'zepa'ga txā'wē txhitxhme', naasáa peeygāhçxa yuuçxáak ewmeesatewa txhitxh. Aça' ew yũuna fxi'zepa'gaçxáa Dxusa' txhitxhwaça', Dxusa' peeygāhçxak txhitxh jīya' ājame'nja'w.

<sup>7</sup>Israelwe'sxa' ewte neeyũuwa'ja's pakweçxawa txazíi yu' uymeeta', vxite yu' Dxus we'weni's nwēese'jmeeta' naa pa'ga. Naasáa Dxus txhitxhnisa maaíçxáatx ewte neeyũuwa'ja's uy. <sup>8</sup>Aça' txā'wē nwēese'jwa'jmeea's we'weçxak Dxus librute na'jī':

Dxusa' txāawe'sxtxi' jiyuwa'jmeesak vxit.

Aça' yafx ji'phçxawa uysamée na'wēçxáata', sa' thū'wē ji'phçxawa wēse'jsamée na'wēçxáatx neeyũu.

Āçxpkaçx txā'wēçxaxáata' jī'k.

<sup>9</sup>Txajīik jxkaahsa Davxidwa na'wē we'we:

Txāawe'sx weçxana fxi'zeni' ewmēeçxáa kasehwaça' ewna, kastigāyni yuukahn.

<sup>10</sup>Txāawe'sx yafxa' peekx suweetxna, uyya' ājakahmén.

Txāawe'sxa' bagaçxte yuhwa ew fxi'zeya' ājameewaça' ewna jīk.

### Judiu ji'jmeesawa Dxus peeygāanisa

<sup>11</sup>Judiuwe'sxa' jxpubaçxa weteyā'jçxa', çpeena yu' Dxus tasxte sxawedwa'jsameetxmanx? Weh yuhwa txā'wē yuuwa'jsameeta'. Txā'wē judiuwe'sx wa'lpa'ga, judiu ji'jmée vxite nasatxku ewte neeyũuwa'ja's pta'sxni yuu, aça' vxite nasa Dxus yakh fxi'zeçte uyçxa', judiuwe'sxwa ki' sxawedxa' yaakxkahn. <sup>12</sup>Judiuwe'sxa' ewte neeyũuwa'ja's jxpa'gaya' wa'lpa'ga, naa kiwete judiu ji'jmée vxite nasa jxukaysatxku selpí, txāasa judiuwe'sx jxukaysa Dxus tasxte ki' sxawedniñū' wejx wala selpiina.

<sup>13</sup>Āçxha' judiu ji'jmée vxite nasa jīnisa i'kwe'sxtxi we'weya'wath, txāa pa'gatey adxa' judiu ji'jmée vxite nasatx Dxus yuwe's pta'sxya' kaahnisath, txāasa kxtey yuuya'wath. <sup>14</sup>Txā'wē yũute', i'kwe'sx ewte fxi'zeni's adx jil'j maaíi yu' uyçxa', i'kwe'sx na'wēy ewte fxi'zewa'ja's pakweya' yaakiwáatxna sūju'th. <sup>15</sup>Judiuwe'sx e'skhē nvxiitni yuupa'ga judiu ji'jmée vxite nasatx Dxus yakh weçxana fxi'zewa'ja's ji'phu. Txāasa judiuwe'sxa' Dxus tasxte ki' sxawedna pa'jçxa', uuniijū ki' itxi yuusáa na'wēsa yuutxna. <sup>16</sup>Ū'tasx kíhwa nyafxtewe'sxa's Dxus jīi peeste', neeyũusáawa jxukak Dxus bedekīyni yu'. Fxtūu tasxa' Dxus jīite', ku'tawa jxuka Dxus jīiçxaxáata'.

<sup>17</sup>Judiuwe'sx maafi yu' uuhnisa oliwo fxtüu ku'ta's spê'thni na'wêtx yuu. Aça' txãa spê'thnite yu' uuhnimeesa oliwo ku'ta's püpçxa kayweçe'jnisa na'wê i'kwe yuu, i'kwe'sx judiu jil'mée vxite nasaçxawa. Txãasa i'kwe txãa fxtüu tasx na'wêy ewsa yuuna pa'j, oliwo fxtüu tasx itxisate kayweçe'jni yuupa'ga. <sup>18</sup>Nawa txãa ku'ta spê'thnisate jxthaakwe ewsath sühna yu' yaakxnu. Mpa'yajkx, txã'wême' ku'ta püpxnisa txã'wê fxtüu tasx itxi yuwa'ja's üsu'çme'; fxtüu tasx kiwete iwehçesak ku'ta püpxnisa's itxi yuwa'ja's üsu'.

<sup>19</sup>Txã'wêtawa, naa süjuwá'ga: Txãa fxtüu ku'ta spê'thnite kayweçe'jya' adxa's peejxne'ta yu', txãasane'ta ku'ta dxih yu'sa' spê'th süjune'ga.

<sup>20</sup>Nawa idxa's kxtee kayweçe'jya' sühçxa spê'thni yuumeeta'.

Txãawe'sxa' Kristo's jxpa'gaya' wa'ltxi txãa pa'ga yuuçxáatx spê'thni yuu. Naapkaçxha' idxa' Kristo's wa'lmeeg jxpa'ga, txãa pa'ga yuuçxáag txãawe'sx üsnite yu' idx pa'jya' äja. Txãa pa'ga iwejçx yajkxmée, wala jxpa'yakx mfxi'ze. <sup>21</sup>Txã'wême', Dxusa' judiu txajx txhitxhnisa yuhtxwa thëyméek kutxi'j na' idxa's yu' wejx txã'wê thëymée kutxi'jina jxpa'yakxmeete'. <sup>22</sup>Üs miiyajkx: Dxusa' wala yuh peeygāasa'. Nawa juuna'ya'wa txã'wêyçxá'. Nwëese'jsamée yakh yu', wala yuh juuna'sa'. Nawa idx yakh yu' wala yuh peeygāasa'. Txã'wêyā'the', txajx peeygāanijü txutemée mfxi'ze. Txã'wê yuumeçxa', idxwa kutxi'jnisa yuune'ga.

<sup>23</sup>Nawa judiuwe'sxa' Dxusa's ki' pakweçxa yu', Dxus tasxtey thëymée ki' pa'jya' äjatxna, txãa pa'gatey Dxusa' thëymée jxpa'gawa'ja'. <sup>24</sup>Txã'wê idxa' judiu jil'mée vxite nasag yu' na's yuhwa thëyméek ewsate yuutxa. Naapkaçxha' judiuwe'sx yu' Dxus txhitxhnisatx yu', aça' txãawe'sxtxi' wejx thëymée ki' jxpa'gana.

### Israelwe'sx Dxus tasxte jxuka sxawedni

<sup>25</sup>Yakhtê'jwe'sx, Dxus ma'wê yūuya'waçxawa txãa yuuçxáak jii yu' txã'sna mjiyuwe açxha' iwejçx yajkxna fxi'zeya'mée: Judiuwe'sx maafi yu' txã'wê yuh Dxusa's nwëese'jmeçxa txuteetx. Nawa judiu jil'mée vxite nasa maazkuëesa Dxus tasxte pa'jwa'jsa üstxna txãa jxuka ähpkaçxçxáatx judiuwe'sxa' Dxus tasxu txutee. <sup>26</sup>Sa' vxite nasa jxuka Dxus tasxte pa'jna jxã'jaçpkaçxha', judiuwe'sxa' ki' jxukay nwe'wenisa yuutxna. Txã'wê yūuwa'ja's Dxus libroute na'wêk pta'sxi':

Nwe'wesa' Jerusalen çxhabu pa'jçxa',  
Jakobwe'sx ewmée yūuni's txudena.

<sup>27</sup>Txã'wê ewmée yūuni's txuhdeya'th puutx we'we txãawe'sx yakh jī'k.

<sup>28</sup>Txã'wê i'kwe'sx ewte neeyūuwa'ja's jil'phukahñçxáatx judiuwe'sxa' Dxusa's açesa yuu. Nawa Dxusa' txãawe'sx yuutxi' açe'çme', txãa pa'gatey judiuwe'sxa' nyafxiitey Dxus txhitxhnisatx yu' naa pa'ga. <sup>29</sup>Txãa pa'gatey Dxusa' üsyā'jçxa', kusal'ja'çme', sa' pa'yayā'jçxa', wa'lu'çme'. <sup>30</sup>Nyafxiia' i'kwe'sxa' Dxusa's jiimeçxa nwëese'jsamée i'kwe yu'. Nawa açxha'

judiuwe'sx nwēese!jeçmeete yu', i'kwe'sxa' Dxus peeygāanisa i'kwe yuu.

<sup>31</sup>Nyafxíia' i'kwe'sxwa ma'wēkwe nwēese!jsamée yu', txā'wēy judiuwe'sxwa āçxha' nwēese!jmée ūsta'. Nawa i'kwe'sxwa ma'wēkwe Dxus peeygāani's jxpa'ga, txā'wēy jxpa'gaya' íçxáa txā'wē nwēese!jmée ūsta'. <sup>32</sup>Txā'wē teeçxsaxçáa thaakwe ewsath sa' thaakwe peeygāanisath sūjkahmenku e'zítz j'a'daçxah nwēese!jwa'jmeete vxit txāa na'wēçxaxçáa peeygājxa'.

<sup>33</sup>Dxusa' ma'wē yūuwa'ja'swa seena' yuh zhiçxkwe ew pheu'jçxa ji'phune' txā'sna yajkxte', le'çxkweçxáa yuhwa ya'jiyu'çme', sa' pta'sxya'wa ya'āja'çme'. <sup>34</sup>Dxus ūus yaakxni's çkimçxá' jiyusa ūstxmanx? çKimçxá' Dxusa's kaapiya'jsa ūstxmanx? <sup>35</sup>Kijkihwa jxuka Dxus jiiçxaxçáata' txajx nvxiitnisa, aça' çkimçxá' adx ji'sthu Dxusa's pees jiwa'jsa ūstxmanx? <sup>36</sup>Txāasa Dxusa' seena' yuh wala ewsa' bagaçxtewa nes yuuwa'jsa. Txā'sa' seena' yuh wala weçxawa'l' ji'ptha'w.

### Kwe'sx itxi fxi'zeni's Dxus kusete dukhni

**12** <sup>1</sup>Adx yakthē'jwe'sxtxi neewe'we'th: Dxusa' txakwe wala peeygāapa'ga, āçxha' i'kwe'sx itxi fxi'zeni petx kakwey'ājçxa jxuka kīh pka' yuhwa ji'phmée txajx kuseteçxaxçáa ya'mdukhwe, Dxusa's yuuçxáa selpiina fxi'zeya'. Dxusa' txā'wē yūuni'sku jxthāasu' naa pa'ga kxtey yuuwa'l' ji'ptha'w. <sup>2</sup>Āçxhüyā'ja' naa kiwetewe'sx na'wēy yu' fxi'zenuwe, wejxwa i'kwe'sx fxi'zeni i'kwe'sx ūus yaakxni txāatx jxuka myu'pthehwe, kīhtewa jxuka u'se yuuna pa'jya'. Txā'wē yūuçxa Dxus jxthāasni ewsa, txajx dxi'pte zhiçxkwe wēt fxi'zeniçxá's jiyune'kwe.

<sup>3</sup>Dxusa' peeygāhçxa adxa's neewe'wek i'kwe'sxtxi yu'kxpejkahn, txāa pa'ga yu'kxpehwa'l' ji'pthu: Adxçxáath thaakwe selpi' sūhna maa yuhwa iwejçx yaakxwa'l' ji'phmée i'kwe, naasáa kīhte selpiwa'jsa ne' Dxusa' nvxiht txā's yuuçxáana kxtey myūuwe, wala jxpa'yakxna. <sup>4</sup>Nasaa kakwe's miyajkxwe: Txā' teeçxçáaaxçawa wala kuh jwed ji'pha', sa' fxiyfxiyçxahtx selpi', teeçx kakwetewe'sxçxáa we'sxçxawa. <sup>5</sup>Txā'wēy kwe'sxwa wala kuhçxawa, jxukaysa Kristo yuuçxá'stha'w selpi', jxukaysa kxteeçxah fxiyfxiyçxah selpiina.

<sup>6</sup>Kwe'sx selpiiya' ājawa'ja's Dxusa' fxiyfxiyçxajk ūs, kīhteçxah selpiiya' ājawa'jsa ne'tka'w yu' txāa yu'sa' jxukak ūs. Aça' txāatxi' wala jxpa'yakx iijxūwa'l' ji'ptha'w. Meeçxawa Dxusa' txajx yuwe's pta'sxya' ājawa'ja's ūste', txajx kaajiyu'jniçxá's kxtey yuuwa'l' ji'ptha'w. <sup>7</sup>Vxitesatx selpiina fxi'zewa'ja's ūste', txā'snawa kxtey yuuwa'l' ji'ptha'w. Sa' maawa kaapiya'jya' ājasa' txā'sa' kxtey yuuwa'ja'. <sup>8</sup>Nxuste fxi'zesatx puutx pu'çxya' ājasa' txā'wē yūuwa'ja's nvxiitwa'jme'. Peesya' yaakiççxa', kaaswedu'juna sūhmée txā'wē peeswa'ja'. Dxus luuçxtxi jxpe'jsa', wala jxpa'yakx jxpe'jwa'ja'. Peejiina fxi'zesatx pu'çxsa', weçxana pu'çxwa'ja'.

### Dxusa's jiisa' na'wē yūuwa'ja'

<sup>9</sup>Teeçxsa na'wēçxah puutx ya'peeygāawa'ja's mji'phuwe, ísxiimée ūusuh jxuka yajkxna. Ewmeesa's nwēese!jmée ewsaçxá's kxtey myuuwe.

<sup>10</sup> Yakhthê'ja's juuna' yuumée wejxwa yakhthê'ja' thaakwe walasa' sūhna puutx ya'mpeeygāhwe.

<sup>11</sup> Dxusa's selpiwa'ja'sçxáa ūsuh jxuka weçxana mpa'pçxuwe, wa'l yajkxmée.

<sup>12</sup> Ewte pa'l'jwa'ja's jii i'kwe txāa pa'ga weçxana mfxi'zewe. Nxuswa'l'en pa'thewa txā'sa' yajkxmée, bagaçxtewa Dxus yakh yuuçxáa puutx we'wena mfxi'zewe.

<sup>13</sup> Yakhthê'jwe'sx peejiina fxi'zesawe'sxtxi' mpu'çxwe. I'kwe'sx yatte pa'jsatxwa wa'lmée mpa'gawe.

<sup>14</sup> I'kwe'sxtxi ahçena pkxuusatx ka'tu yu' ewçxáa myūuwe, wejx yuuwa txāawe'sx pa'gate Dxusa's mneewe'wewe nwe'wekahn.

<sup>15</sup> Weçxasáa yakh i'kwe'sxwa weçxaa mpu'çxwe, sa' nxussa yakh i'kwe'sxwa nxus mpu'çxwe.

<sup>16</sup> Puutx ja'daçxah ewçxáa mfxi'zewe. Jxthaakwe jiith sūhçxa iiwejçx yajkxmée, āhmeekwesa na'wēyçxáa mfxi'zewe.

<sup>17</sup> Makwe ewmée yūusaatewa, ka'tu yu' ewmée yuuwa'ljme'. Ew yuuwa'ljçxá's pa'pçxuwa'ja' jxukaysatx.

<sup>18</sup> Jxukaysa yakh ew fxi'zewa'ljçxá's mpaakwewe, i'kwe'sxtxi ma'wē wejx ew theguna txāa yu'sa' jxuka kxtey yuuna. <sup>19</sup> Yakhthê'jwe'sxtxi neewe'we'th i'kwe'sxtxi ewmée yūusaatx ka'tuwa ewmée yūuwa'ja's pakwena fxi'zekahmén. Txā'wē yūumée wejxwa idxna ewmée yūusa's kuçx yuunu, Dxus kastigāywa'jsa' naa pa'ga. Txajík Dxus librutewa na'wē we'we': Ewmée yūusatx kastigāywa'jsa' adxthu. Adx jiine'tka jī'k. <sup>20</sup> Txā'wē ka'tu ewmée yūuwa'ja's yajkxmée na'wē myūu: Idxna açesa ū'wa'l' jiphmée wēena fxi'zeçte', ū' mpuuç. Sa' yū'wēena fxi'zeçte', tudxwa'ljwa mes. Idxa' txā'wē yūuçxa', kaythame'jene'ga jī'k. <sup>21</sup> Idxna ewmée yūusa's kaaknayu'ljnu, wejxwa idx khuē'y meknay, ka'tu' ew yūuçxa.

### Naa kiwete jxkaahsawe'sx ma'wēsatsxwa nwēese'ljwa'ja'

**13** <sup>1</sup> Naa kiwete jxkaahsawe'sx ma'wēsatsxwa jxuka nwēese'ljna mfxi'zewe. Txāawe'sxa' jxuka Dxus nvxiitnišaçxaçxáata'. Maa yuhwa Dxus nvxiitnimeesa yu' meeta'. <sup>2</sup> Aça' maawa jxkaahsawe'sxtxi açesa' Dxus nvxiitnisatx açesa yuuna. Txā'wē açesa' yuuwesa kastigāywa'l' yuuna. <sup>3</sup> Jxkaahsa ūsta' txāawe'sxa' ew yūuna fxi'zesatxi' kastigāywa'jsameeta'. Txāawe'sxa' ewmée yūuna fxi'zesaçxáatx kastigāywa'jsata'. Aça' jxkaahsawe'sxtxi ūukhmée fxi'ze wēeçxa', txāawe'sx yu'kxpehnitx jxuka nwēese'ljna mfxi'zewe. Txā'wē yūusatxi' nwe'wewa'jsata'. <sup>4</sup> Txāa pa'gatey jxkaahsawe'sxa' Dxus nvxiitnisata', idxna pu'çxwa'jsa. Nawa idxa' ewmée yūuna fxi'zeçxa', ūukhwa'l' jiphune'ga, txāa pa'gatey jxkaahsawe'sxa' peekçxáa ūsmeeta', txāawe'sxa' Dxus nvxiitnisata'. Txāa pa'ga ley ma'wē jxkaathe', kxtey yuutxna ewmée

yũusa's kastigãyna. <sup>5</sup>Txãa pa'ga jxkaahsawe'sxtxi nwẽese'jwa'ja', nawa kastigo's ũukhçaxçáa nwẽese'jmée, wejxwa Dxus jxkaahni's kxtey yuuçthu sũhna nwẽese'jwa'ja'. <sup>6</sup>Txãawe'sxa' Dxus nvxiitnisayã'jçxa', txãawe'sx thegwa'j yu'sa' kĩhnawa jxukatx kxtey yuuna fxi'ze'. Txãa pa'ga txãawe'sxtxi dukhwa'j vxyu's ũsawa'j ji'phi'kwe. <sup>7</sup>Kĩhçxah yuuwa'j ji'phçxawa, txã'sa' kxtey yuuwa'ja': vxuyu gobierno ji's yuulçxa', txã'snawa dukhwa'ja'. Sa' maaçxahtx nwẽese'jwa'j ji'phçxawa, txãawe'sxtxi' nwẽese'jwa'ja' wa'lmée.

<sup>8</sup>Kĩh yũuwa'ja'swa jxuka kxtey yuuwa'ja', kĩh yuul yuhwa ji'phmée fxi'zeyá, naasáa puutx ya'peeygãawa'ja's yuuçxáa bagaçxtewa ji'phuna nes yuuwa'ja'. Txã'wẽ puutx ya'peeygãasa' Dxus jxkaahni leya's kxtey yuusaaçxa txã'wẽ yuuna. <sup>9</sup>Dxus leya' na'wẽk jxkaaja': Ptamsayã'ja' vxite yakh kazx pkal yuuwa'jme'. Nasa ikhwa'jme'. Pesweewa'jme'. Vxitetx ĩsxiina nuywe'wewa'jme'. Vxitee jĩitx kusa'j wẽena fxi'zewa'jme' ji'k. Aça' txãa jxkaahnitxi' jxuka kxtey nwẽese'jya' na'wẽ yũuwa'ja': Vxitetxwa mpeeygãh, idx ma'wẽga ya'peeygãja' txã'wẽy ji'k. <sup>10</sup>Txã'wẽ puutx ya'peeygãawa'ja's ji'phçxa', ewmée yũuwa'j yu'sa' ya'yajkxmeena. Na'jĩ'th na': Peeygãanisa's ji'phte yuuçxáak Dxus jxkaahni leya's kĩhte yuhwa peejxmée jxuka kxtey ya'yu'.

<sup>11</sup>Txã'wẽ peeygãawa'ja's jxpa'yakxmeene'kwe aça' açxha' jweeíçxáa utxaana u'jweça' kwe'sxtxi jxukate nwe'wewa'j ena', txãa pa'ga jxpa'yakx meswe. <sup>12</sup>Txã'wẽ yũuwa'j ena' pa'jya' jxthẽyuuumeena, txãa pa'ga çxhi'dxte fxi'zeni's nvxihtçxa, eena'te fxi'zewa'ja's jxpa'yakxwa'j ji'ptha'w. <sup>13</sup>Na'wẽ yũumée: ewmée yũuwa'jçxá's yajkxna, kazx pkal yuuna, puutx yahçena puutx puina, beka yat-su tũuna susna txã'wẽ yũumée, ewçxáa yũuna zhiçxkwe fxi'zewa'j ji'ptha'w. <sup>14</sup>Naasáa Jesukristo ma'wẽ jxkaathe', txã's yuuçxáa jxuka nwẽese'jwa'j ji'ptha'w, peekx ũus yaakxni ewmeesa yu's nwẽese'jmée.

### Yakhthẽ'ja's açewe'wewa'jme'

**14** <sup>1</sup>Kristo kaapiya'jni's açxamée ew jiisa yakhthẽ'ja's wa'lmée mpa'gawe, txajx jxpubanisu açewe'wemée. <sup>2</sup>Miiyajkxwe wakx vxiteya' naa sũju'tx: ũ'nisa yu'sa' kĩhnawa jxuka ũ'wa'ja' sũju'tx. Naapkaçxha' Kristo kaapiya'jni's açxamée ew jiisa' ũ'wa'ja's txhitxhçxa ũ'wa'ja' sũju'tx. <sup>3</sup>Aça' maa sũhmée kĩhnawa jxuka ũ'sa' txhitxhçxaçxáa ũ'sa's açewe'wewa'jme'. Txã'wẽy txhitxhçxaçxáa ũ'sawa kuçx açewe'wewa'jme' kĩhnawa jxuka ũ'sa's. Ma'wẽ ũ'saçxawa txãawe'sxa' Dxus luuçxta'. <sup>4</sup>Idxa' çkimçxaga iidx jxpe'jnimeetx açewe'we'? Txã' ew ma'k yuu ewmée ma'k yuu nawa txã'sa' patron jxpe'jsa jiina, txãa pa'gatey jxpe'jsa' ma'wẽ ew fxi'zewa'ja'swa txãa pu'çxwa'jsa'.

<sup>5</sup>Vxiteya' naa sũju'tx: Fxiesta en yuutxi' jxuka ki'swa'ja' sũju'tx. Naapkaçxha' vxite' maa fxiesta yuutxi' ki'swa'jme' sũju'tx. Ma'wẽ

yaakxsaçxawa teeçxsa na'wêçxah i'kwe'sx ùuste ew ùusutheniçxá's nwêese'jna mfxi'zewe kuçx açewe'wemée. <sup>6</sup>Txãa pa'gately fxiesta entxi jxuka ki'ssawa, Dxusa's weçxanak ki'su', açá' fxiesta entxi jxukamée ki'ssawa Dxusa's íiçxáak weçxana fxi'ze'. Txã'wêy kíhnawa jxuka ù'sawa Dxusa's weçxanak ù'we', açá' kíh iiyuutxi' ù'sameewa Dxusa's íiçxáak weçxá'. Jxukay Dxusa'sçxaxáatx weçxá'.

<sup>7</sup>Txãa pa'gately kwe'sx ítxi fxi'zeni kwe'sx uuwa'l ma'k yuu nawa txã' kwe'sx jii meeta', açá' peekx ma'wêwa yúuna fxi'ze'nja sùhwa'l jì'phmeetha'w. <sup>8</sup>Na'wê ítxi fxi'ze'tha'w txã' Kristo jì', sa' uumtha'w nawa Kristo jxthãasniçxá'stha'w kxtey yu', txãasa ítxi fxi'zeni ma'k yuu uu en ma'k yuu nawa Kristo jiiçxaxáata'. <sup>9</sup>Txã'wê Kristo' ítxisawe'sx ma'tx yuu uusaawe'sx ma'tx yuu nawa jxukaysate namu yuuya'íiçxáak uuniijüwa ki' ítxi yuu. <sup>10</sup>Namu' Kristo', açá' idxa' namumeeçxa' çkíjxa'ga iidx yakthê'ja's ewmeesa' jina açewe'we'? Dxus tasxte kuutxa'jni yuua'jsatha'w, açá' Dxus yuuçxáa ma'wê yuusaatewa we'wewa'l jì'pha'. <sup>11</sup>Txají Dxus tasxte kuutxa'jni yuua'ja's Dxus librute na'wê fxi'jni':

Adxa' Dxus ítxisa isath we'we',

Majüwe'sxwa jxuka adx tasxteçxaxáa peejxükwena pa'jçxa,

Dxus yuh yu'ga jina weçxaatxna.

<sup>12</sup>Txã'wê yúuçxa teeçxsa na'wêçxah Dxus tasxte paswa'l jì'phu'nja'w ma'wê yúusaaxawa.

### Yakthê'ja's kaypuba'jwa'ljme'

<sup>13</sup>Txãa pa'ga açxhüyã'ja' txã'wê ewmeeg yu' jina puutx açewe'wena fxi'zewa'l jì'phmeetha'w. Txã'wê yúumée wejxwa ewçxáa yúuna mpu'çx, yakthê'j jxpubakahmén. <sup>14</sup>Adxa' jiith Kristo Jesus yakh fxi'zesa yakha', kíh ü'yuhwa ewmeesa yu' meea'. Nawa txã'wê ewmeena sùhna yaakxsa yakh yu' ewmée yuhna. <sup>15</sup>Nawa iidx yakthê'j dxi'pte jxpa'yakxmée kíhnawa ü'pa'gaçxáa txãa yakthê'ja' jxpubawána açá' idx yuuwesa yuune'ga peeygãasamée. Kristo uuçxa nwe'wenisawe'sxtxi' idxa' kaypuba'jnu iidx ü'nisa yakh. <sup>16</sup>Idx yakh yu' ewsaçxawa, vxitesa yakh yu' ewmeesa wáa yuuna açá' txã'wê yúuweçxsa yuutxi' wala mpa'yajkx. <sup>17</sup>Txãa pa'gately Dxus yakh fxi'zewa'ja' ü'nisatx jxpa'yakçxa txã'wê Dxus yakh ya'fxi'ze'çme', naasáa Dxus Espiritu pu'çxte yuuçxáak Dxus yakh wêt weçxana jxpubamée fxi'zewa'ja's ya'jì'phu'. <sup>18</sup>Txã'wê vxitetx kaypuba'jmée jxpa'yakx Kristo's selpiite' Dxusa' weçxa'k açá' nasawa weçxa'tx txã'wê yúute'.

<sup>19</sup>Txã'wê puutx ew yúuna puimée fxi'zewa'lçxá's pakwewa'l jì'ptha'w, Dxus yakh jweeíiçxáa çxhãçxha fxi'zewa'ja's puutx ya'pu'çxna. <sup>20</sup>Ü'nisa' jxuka ewsata'. Nawa vxitesatx kaypuba'jwa'ja's ü'teçxáa ewme'. Txãa pa'ga Dxus yakh fxi'zesa yakthê'jwe'sxtxi' kaypuba'jnu iidx ü'ni yakh. <sup>21</sup>Txã'wê peekx yakthê'ja's kaypuba'jwa'l yu'sa' ü'nimée wejx ewa', çxiçx, vxino,



kīhwa kaypuba'jwa'j yu'sa' jxuka. <sup>22</sup>Idx yakh yu' kīh ũ'wa jxuka ewsatewa jiiçxa', iidx ũusteçxáa txāa sūhna mfxi'ze Dxus dxi'pte. Ewmeena sūhwa'ja's ũusteçxáa yuhwa yaakxsamée yakh yu', ew yuja'. <sup>23</sup>Nawa ewmeewáana sūhna kuh jwed yajkxna ũ'sa yakha', ewmée yuja'. Txāa pa'gatey ewmeewáanax sūhwa'ja's ji'phçxa nwēese'jmeete', txāa yu' pkal yuja'.

### Vxitesa yakh ewçxáa yūuna fxi'zewa'ja'

**15** <sup>1</sup>Dxus yakh çxhāçxhayā'j fxi'zesa' peekçxáa wēt fxi'zewa'ja's pakwemée, pu'çxwa'j ji'ptha'w Dxus yakh fxi'zewa'ja's açxamée ew jiiatx. <sup>2</sup>Kwe'sxa' teeçxsa na'wēçxah vxite nasatx pu'çxna wēt kaafxi'ze'jwa'j ji'ptha'w ewçxáa yūuna, txāawe'sxa' Dxus yakh jweeíçxáa çxhāçxha fxi'zeya' ājakahn. <sup>3</sup>Txāa pa'gatey Kristo txakwe jxtuhthesa yuhçxawa, peekçxáa wēt fxi'zewa'j yu'sa' pakwemée, wejxwa vxitetx wēesxuni's txāak jxpa'ga. Txā'sna we'weçxak Dxus librute na'jī': Idxna wēesxuni's adxthu jxpa'ga jī'k. <sup>4</sup>Dxus librute fxi'jni ũsta' txā' kwe'sxtxi kçxhāçxha'jwa'jsata', nxuswa'j en ma'wēsa pa'thewa nxusmée çxhāçxha yajkxna fxi'zeya' piyakahn. <sup>5</sup>Nxuswa'j en pa'thewa çxhāçxha fxi'zewa'ja's Dxusku ũsu' na' txāaí pu'çxhina puutx ewçxáa yūuna Kristo Jesus na'wēy fxi'zekahn, <sup>6</sup>kxah kxteeçxah jxukaysa kwe'sxtxi jxpe'jsa Jesukristo Tata yuuçxá's tuuthe'jene'kwe.

### Judiu jil'mée vxite nasatx Dxus yuwe's pta'sxni

<sup>7</sup>Kristowa ma'wēga i'kwe'sxtxi jxpa'ga txā'wēy i'kwe'sxwa wa'lmée mpa'gawe maa yakthē'jtxwa, Dxus weçxakahn. <sup>8</sup>Miiyajkxwe: Dxusa' kwe'sx yaçgawe'sx yakh puutx we'wek Kristo kīiwa'ja's, aça' txāa puutx we'weni kxtey yuukahnku Kristo' kīh judiuwe'sxtxi selpiiya'. <sup>9</sup>Sa' judiu jil'mée vxite nasawa Dxusa's jxpa'gaçxa weçxana tuuthe'khanku Kristo' kīh. Txā'sna we'weçxak Dxus librute na'jī':

Txā'wē ew yūupa'ga txāawe'sx kxavxyte idxa's weçxana memna tuuthe'je'nja jī'k.

<sup>10</sup>Sa' vxite ajkhēwa na'wēk we'we':

Judiu jil'mée vxite nasaçxawa judiuwe'sx yakh ja'daçxah wēt wēt miiyajkxwe jī'k.

<sup>11</sup>Sa' vxite ajkhēwa pta'sxi' íçxáak:

Judiu jil'mée vxite nasa jxukaysawe'sx Dxusa's weçxana mtuuthe'jwe, Dxusa' seena' yuh walasa' jīna nasa jxukaytxi pta'sxna.

<sup>12</sup>Txajíçxáak Isaiaswa na'jīna fxi'lj:

Jesé jil'j teeçx kasejena, judiu jil'mée vxite nasatx jxuka yamuya'. Aça' txāawe'sxa' nwe'wenisa yuutxna jī'k.

<sup>13</sup>Kwe'sxtxi nwe'wesa Dxusa' i'kwe'sx ũuste wēt wēt weçxana fxi'zewa'ja's ũsuna txā'sna jxpa'gasatxi's, kxah Dxus Espiritu pu'çxte', Dxus nwe'wenisatha'w yuu sūhna weçxana fxi'zene'kwe.

<sup>14</sup>Adx yakhthê'jwe'sx, adxa' ew jiith i'kwe'sxa' ew yūuwa'l'j yuuxçá's ne'kwe ūuste ji'ph fxi'ze', ma'wē yūuwa'l'ja'swa sxiigmée. Txāasa ne'kwe teeçxa na'wēçxah puutx ew ya'yu'kxpehna fxi'ze' sūju'th. <sup>15</sup>I'kwe'sxa' txā'wēyā'l'j sxiigmée fxi'zesa ne'kwe, nawa adxwa fxii yu'kxpehna fxi'jaçthu Dxus yakh wejx ew fxi'zewa'ja's kaapiyu'l'jna. <sup>16</sup>Txā'wē yūuwa'l'ja's Dxusku adxa's neewe'weçxa nvxiht, judiu jil'mée vxite nasatx Jesukristo kaapiya'l'jni's pta'sxkahn. Txāa Jesukristo kaapiya'l'jnisaí Dxus yuwe ewte nvxiitwa'l'ja' txā'snath adxa' pta'sxi', judiu jil'mée vxite nasaçxawa Dxus Espiritu pu'çxte', Dxusa's jiyuçxa ewte neeyūukahn.

<sup>17</sup>Txāasath adx ūuste wēt wēt yaaki', Jesukristo kaapiya'l'jni's pta'sxna Dxusa's selpi'th sūhna. <sup>18</sup>Nawa txā'wē yūuwa'l'ja's Kristok adxa's pu'çx judiu jil'mée vxite nasaçxawa Dxusa's nwēese'khan, txāawe'sx ew jiyukahn yuwejuwa pta'sxna, kim yuhwa ājanimeesatx ātewa kaavxya'l'j'nik yuu Dxus Espiritu pu'çxte. <sup>19</sup>Txā'wē yūunath Kristo yuwe ewte nvxiitwa'l'ja's mtee mteewa pta'sxna jxā'l'j, Jerusalente takhçxa Ilríko kiwete pa'phkaçx. <sup>20</sup>Txā'wē vxite pta'sxnisu yu' pekūjxa'meeth yajkx, wejxwa bagaçxteçxáa yuhwa Kristo yase's kxsusnimeesuth txajx yuwe ewsa's pta'sxya' yajkx, Dxus librute na'j'i'k txāa kxtey yuukahn:

<sup>21</sup>Txāawe'sxa' bagaçxteçxáa yuhwa Dxus yuwe's pta'sxni meesaçxawa, wēse'jetxna,  
Sa' jiyutxna, bagaçxteçxáa yuhwa jiimeesaçxawa jī'k.

### **Pablo Roma çxhabna u'l'jya' yaakxni**

<sup>22</sup>Txā'wē Dxus yuwe's kaapiya'l'jna u'l'juçxath i'kwe'sx tasxna yujxa' yu' tudu'çmée, maz uswa yujxa' yajkçxawa. <sup>23-24</sup>Nawa āçxha' naa ja'dasu pekūhna jxā'th na' Espanxa kiwen u'l'jweççxa', i'kwe'sx tasxsuwa iipa'l'j uykhēu'nja txā'wē yūuwa'l'ja's nyafxiith yaakxni ji'phu'. Aça' i'kwe'sx yakh pkhaakhena ūçxa Espanxa kiwen u'l'jweçte', pu'çxhine'kwe sūju'th. <sup>25</sup>Nawa āçxhí yu' Jerusalenna u'l'jweçthu kxtee yakhthê'jwe'sxtxi kīhçxáawa pu'çxwa'l'j jxūna. <sup>26</sup>Jerusalente yakhthê'jwe'sx kīhwa ji'phmeesa ūsta' txāawe'sxtxi pu'çxya' jīçxa vxyuu pkhakhtxi Macedonia vxite' Akaya kiwesuwe'sx txā'sna jxūna u'l'jweçthu. <sup>27</sup>Txā'wē pu'çxte ewna sūhwa'l'ja's ji'phutx, txāa pa'gateg isa ew yajkxte yu' Macedoniasuwe'sxa' yuultxi yu', txā'wē judiu jil'jwe'sxa' Dxus yuwe ewsa's jxtxuhdetx judiu jil'mée vxite nasatxwa. Txāa pa'gatx Dxus yuwe ewsa's kwe'sxtxi pta'sxpa'ga ka'tuwa kaasxwedul'jwal'j ji'ptha'w jīçxa txāawe'sx ji'phunisa yakh pu'çxya' yajkx. <sup>28</sup>Aça' txā'wē Jerusalente pa'l'çxa' pkhakhni vxyuu txāawe'sxtxi dukhçxa', Espanxa kiwen u'l'jya'wath, txāasa i'kwe'sx tasxsuwa dudte ne'ka'nja. <sup>29</sup>Adx i'kwe'sx tasxte pa'the', i'kwe'sxa' jweeíçxáa Kristo yakh çxhāçxha fxi'zene'kwe sūju'th.

<sup>30</sup>Yakhthê'jwe'sx, i'kwe'sxtxith neewe'we': peeygāawa'l'ja's Dxus Espiritu ūste ji'phi'kwe, txāasa adxa's peeygāhçxa Jesukristo's pi'kxçxa

adx pa'gate Dxus yakh puutx we'wekahn. <sup>31</sup>Judea kiwete açesa ũsta' txāawe'sx adxna kīhwa ewmée yūukahmén Dxusa's mpi'kxwe, sa' Jerusalemte yakhtē'jwe'sxtxi pu'çxwa'l jxūna u'jweçthu txā'snawa weçxana jxpa'gakahn, <sup>32</sup>kxah Dxus pu'çxte', ewçxáa ki' sxawedçxa i'kwe'sx yakh weçxana ũswa'ja's ji'phu'nja. <sup>33</sup>Dxusa' i'kwe'sx jxukaysa yakh pi'kxna nes yuuna, ewçxáa kaafxī'ze'jna.

### Nasa iisa yuwe weçxaa kaahni

**16** <sup>1</sup>Kwe'sx npe'sx Fxebe pa'the', txā'sa' wa'lmée jxpa'gakahn neewe'weçthu i'kwe'sxtxi, txā' Cenkea çxhabte pkhaakhesatx selpiisa'. <sup>2</sup>Txāa pa'gatey Dxusa's jiiyā'jsa' ma'wē yūuwa'ja'swa jii i'kwe na' txā'wēçxáa yūuna mpa'gawe, Kristo's selpiisa' naa pa'ga kwe'sx npe'sxna sūhna. Sa' txāa kīh peejini'swa mpu'çxwe, txāa pa'gatey txā' maatxwa wala pu'çxsa' txāasa'fīk adxnawa pu'çx.

<sup>3</sup>Priscila vxite' Akila txāawe'sxtxi yuwe mweeçxawe, Kristo Jesusna adx selpiiçte', txāawe'sxa' kxtee adx yakh mjīi pu'çxsatx yu'. <sup>4</sup>Txāasa'fīttx txāawe'sxa' u'dxih adxna nwe'wena. Txā'wē ew yūupa'gath adxa' txāawe'sxtxi' wala weçxá'. Nawa adxçxáa txā'wē weçxa'çméeth, judiu jil'mée vxite nasawa weçxa'tx Dxusa's jiiisawe'sx. <sup>5</sup>Priscila vxite' Akila txāawe'sx yatte pkhaakhesa yakhtē'jwe'sxtxiwa yuwe mweeçxawe. Sa' adx namiku Epeneto'swa mweeçxawe. Txāak nyafxçxah Akaya kiwete Kristo's ũuste jxpa'gasa yu'. <sup>6</sup>Maria'swa yuwe mweeçxawe, txā' nakwe wala mjīik i'kwe'sx ksxavxyte. <sup>7</sup>Adx jil'j Adróniko vxite' Junias txāawe'sxtxiwa yuwe mweeçxawe. Txāawe'sxa' adx yakh karcelte ũssata', sa' Dxus yuwe's pta'sxya' kaahnisawe'sxtxi yu', thaakwe jiyunisa. Sa' txāawe'sxa' Kristo's jiiisayā'jtx yu' Kristo's adx jiyumeyna.

<sup>8</sup>Kristo's jiisa adx namiku Ampliasnawa yuwe mweeçxawe. <sup>9</sup>Kwe'sx na'wēy Kristo Jesusa's selpiina fxi'zesa Urbano'swa yuwe mweeçxawe, vxite' adx namiku Estakisnawa txā'wēy. <sup>10</sup>Apelesnawa yuwe mweeçxawe, txā'sa' makwe nxuswa'l en pa'thewa, Kristo yakh txutemeek fxi'zesa yu'. Sa' Aristobulowe'sxtxiwa txā'wēy yuwe mweeçxawe. <sup>11</sup>Adx jil'j Herodiana'swa yuwe mweeçxawe, vxite' Narciso jil'jwe'sx Kristo's jiiisatx yuwe mweeçxawe. <sup>12</sup>Trifxena vxite' Trifxosawe'sxtxi yuwe mweeçxawe, txāawe'sxa' Kristo's selpisaatx yu'. Sa' kwe'sx npe'sx Persidanawa yuwe mweeçxawe, txāawa wala mjīisa yu'k Kristo's selpiina. <sup>13</sup>Rufxusnawa yuwe mweeçxawe, txā' wala jiyunisa yu'k Kristo's nwēese'jsa' jīni, sa' txajx njī'ja'swa yuwe mweeçxawe, txā' adxna jxpe'jsa mama na'wēsak yu'. <sup>14</sup>Vxite' naawe'sxtxi yuwe mweeçxawe: Asinkrito, Fxlegonte, Hermas, Patrobas, Hermes, vxite' yakhtē'jwe'sx txāawe'sx yakh ũssayā'lçxa. <sup>15</sup>Vxite' naatx yuwe mweeçxawe: Fxilólogo, Julia, Olimpás, Nereo vxite' txajx npe'sxna. Sa' txāawe'sx yakh ũssa Kristo's jiisa yuutxi' jxuka mweeçxawe.

<sup>16</sup>Teeçxa na'wēçxah ũuste wala wēt yajkxna puutx yuwe mweeçxawe. Sa' Kristo's nwēese'jsa mteewa pkhaakhesa yu' jxukaysatx yuwe weçxaakaja'.

<sup>17</sup>Yakhthē'jwe'stxi neewe'we'th, i'kwe'sxa' wala mpa'yajkxwe na'wē ew fxi'zewa'ja's piya i'kwe txājū kaypuba'jna kaapui'jna fxi'zesatx. Txā'wē yūusawe'sx yakha' mtxuteewe. <sup>18</sup>Txā'wēme', txāawe'sxa' Jesukristo's selpiisameeta'. Txāawe'sx ewmée yaakxniçxá'stxi kxtey yuuna fxi'ze', sa' nasa açxamée ew jiisa yuutxi'sa' kaypuba'ja'tx wala zhiçxkweçxáa we'weçxa. <sup>19</sup>Kristo kaapiya'jni's i'kwe'sx ũusuh jxuka nwēese'jni's jxukaysa jiita', txāa pa'gath adxa' weçxá'. Sa' ewmeesa yu's nwēese'jmée wejxwa ewsaçxá's nwēese'jna ũskahnthu neewe'we'. <sup>20</sup>Aça' kīhtewa jxuka ew kaafxi'ze'jsa Dxusa' i'kwe'stxi pu'çxhina eçxthē'j knaykahmén. Aça' i'kwe'sxa' Jesukristo yakhçxáa mfxi'zewe.

<sup>21</sup>Adx yakh mjii pu'çxsa Timoteowa yuwe weçxaakaja'k, vxite' Lucio, Jasón, Sosípater adx ji'jwe'sx.

<sup>22</sup>Naa karta's fxi'phu'çxsa Tercio adxwa yuwe weçxaakaja'th Dxus yakh fxi'zesatx. <sup>23</sup>Sa' Dxus luuçx pkhaakhewa'j yat pki'jsa Gayowa yuwe weçxaakaja'k, adxa's paadee yat pki'jsa. Vxite' Erastowa yuwe weçxaakaja'k, gobierno vxyu's jxaawsa. Txā'wēy kwe'sx yakhthē'j Kuarto yaasesawa weçxaakaja'k.

<sup>24</sup>Kwe'stxi jxpe'jsa Jesukristo pu'çxhina i'kwe'sx jxukaysatx bagaçxtewa.

### Dxusa's yuuçxáa weçxani

<sup>25</sup>Åçxha' Dxus kusete nvxiituçthu txā' i'kwe'stxi jweeñiçxáa çxhāçxha kaafxi'ze'jena, Jesukristo kaapiya'jni's ma'wētká pta'sx txā'sa' kxtey yuuna. Kwe'sx ewte neeyūuwa'ja's naa kiwemeeteyku Dxusa' pheu'jçxa ji'phu', <sup>26</sup>nawa txā'sa' jū'nasuçxáak kaajiyu'jni yuu, Dxus yuwe pta'sxsawe'stxi kaafxi'ja'jçxa. Txā'sna āçxha' maa kiwetewa jxuka pta'sxni yuuça', maawa Kristo's ũuste jxpa'gaçxa nwēese'khan. Txāa pa'ga Dxusa's wala weçxaawa'j ji'ptha'w.

<sup>27</sup>Dxus yuuçxáa ma'wē yūuwa'ja'swa jxuka jiisa'. Txāa pa'ga txā's yuuçxáa bagaçxtewa weçxana nes yuuwa'ja', kwe'stxi nwe'wesa Jesukristo ew yūupa'ga.